

المدار القطريّة

تقدم

كوميديا

أنّه ومرثي والإرهاب

تأليف

غانم السليطي

مايو ٢٠٠٢

تم عرض هذه المسرحية على خشبة مسرح سينما الخليج وذلك ضمن مهرجان
الدوحة الثقافي الثاني ص ١ - ١٤ مارس ٢٠٠٣
المسرحية عرضت أيام ١٢ و ١٣ و ١٤ مارس ٢٠٠٣ لفهاليات المسرح
دوره ثم تواصل عرضها لجمهور الجمهور

الفصل الأول :

الزمان

بداية القرن الواحد والعشرين

المكان

فيلا سلطان بن شاهين آل غيمة

المنظر

فيلا لرجل أعمال متوسط .. المنظر للصالة الرئيسية فيها .. والصالة يغلب عليها الطابع الذكوري في الذوق من حيث الألوان ... والتحف التراثية من سيوف ... وسدو .. وبعض رؤوس الحيوانات المحنطة كالغزال ... الطيور والصقر .. وبها في المنتصف سلم بشكل نصف دائري يؤدي للطابق العلوي وتحت السلم مكان مثل المخزن مغلق بباب حديد شبيه تماما بأبواب السجن الحديد حتى لونه أسود .. هذا إضافة للمداخل المختلفة كمدخل الصالة الرئيسي في المنتصف والمدخل المؤدي إلى جهة المطبخ .. هناك صورة أو لوحة لوالد سلطان وهو شاهين آل غيمة .. وكأنه قادم من أحمد المتاحف ومن الضروري وجود شباك في الصالة مؤدي إلى الحوش لكنه مغلق طوال الفصل الأول .. المهم الانطباع الأول للصالة أن بها سمة من الوحشية والقوة ... وانعدام الذوق .. ومن المهم وجود جهاز (التوك باك) وسط الصالة .

فاتيمـا

منو ؟

صوت سارة

(باهتمام وبشكل يدل على استعجالها) كم رقم غرفة نورا في المستشفى - بسرعة قوليلي

!؟

فاتيمـا

شنو ؟

صوت سارة

حجرة مال ماما داخل هوسبيتال .. كم نمبر . سرعة يقول !؟

فاتيمـا

(بتأثر شديد) ماما مافيه يروح داخل مستشفى .. ماما فيه داخل بيت مسكين...

صوت سارة

زين بطلي الباب قوليلها سارة صديقتي

(الشغالة تقوم بإغلاق التلفون وتضغط على زر الباب ثم نسمع صوت نورا من الداخل)

صوت نورا

(حيث التعب واضح على صوتها فهي حامل في نهاية شهرها التاسع) فاتيمـا من تكلمين ؟

فاتيمـا

ماما هذا صديقة مال إنته ... اسمه ساره ..

صوت نورا

(وهي قادمة إلى المسرح متسائلة) ساره منهى ساره ؟

(تدخل الآن إلى المسرح ثقيلة الخطى والحركة بحملها .. ومع أنها جميلة ورائعة الحسـن

وصغيرة .. إلا أنها تبدو عجوز في السبعين حتى ملابسها ملابس عجوز !!

نـورا

(محاولة التذكر) سارة ؟! بس قالت لج سارة ؟

(ثم من خلال باب الصالة شبه الزجاجي والشفاف نرى خيال سارة تقف وهي

بيدها تطرق الباب بهدوء ... نورا تقف متأهبة للاستقبال أمرة الشغالة)

نـورا

(مازالت في حالة التذكر) بطلي الباب .. وروحي سوي قهوة ...

(الشغالة تفتح الباب وتذهب باتجاه المطبخ للداخل " تدخل سارة وهي تقريبا في عمر نورا

وهي محجبه... ترسم الدهشة عليها ... وترسم علامات الأسى والحزن على وجهها من

الشكل الذي عليه نورا .. حتى أن علامات الشك بدت عليها الآن فـي أن هذه ليست

صديقتها نورا .. تقفان وجها لوجه تنتظران لبعض)

نـورا

(بفرحة وعدم تصديق) سارة ما صدق ؟

سارة

أنه اللي مب صدقة ... هاذي نورا اللي كانت معاي في الجامعة شفيح تغيرتي

بها السرعة ..!؟

(تقبلان بعض قبل التحية الحارة)

سارة

(باندهاش) ألحين انتي كملتني سنتين من تزوجتي ؟!

نـورا

قصدج من إنسجنت سنة وتسع شهور وثمان أيام بالضبط . من دخلت هالسجن

ساره

مب انتي نورا اللي أنه أعرفها معقوله صرتي جذبه صرتي جنج كبير أـمي

نـورا

(بأسى وحزن شديدين) ومنهو في السجن مرتاح يا سارة

سارة

(وقد ذهلت من الرد ... فتنعاطف بسرعة معها)

يعني ما يخليج اطلعين ولا تروحين ولا تيين كله

قاعدة في البيت وبس ؟!

نورا

(مواصلة جو الحزن والألم) ماطلع .. ماروح ... مايي ... يشيل فيشة التلفون لي طلع
ولي رد ركبها ... هاذي أشياء صعبه لكن أهون وايد من (بجرح من الداخل) عدم
الاحترام المعاملة بانحطاط توصل للذل ... عنده المره والنعال واحد ويقولها بلسانه بكل
جراه ووقاحة ... المره مثل النعال الواحد يفصخها ويلبس غيرها .. مالج رأي في أي
شيء مطلوب تكونين تابع ذليل وتنفيذ كل الأوامر بالسمع والطاعة ... المرأة عنده مالها
أي نوع من أنواع الحقوق حتى اللبس هو اللي يختاره لي ... !! يعني انتي إنسانة غير
موجودة (ثم بكل ضعف تسأل سارة) أنه يصير فيني جذبه يا سارة .. أنه استاهل
هالمصير .. أنه استاهل أعيش مع وحش متعجرف .. متسلط ,, يمسخني من الحياة ...
أنه اللي كان راسي تتصارع فيها الطموحات والأحلام ... الطالبة المتفوقة اللي تعرفينها
... خريجة قسم الكمبيوتر بامتياز وين نورة ذيج يا سارة أنه أشتاق لها ... نورا هياذي
اللي جدامج وحدة تعيش في بيت مافيه فرق فيه بينها وبين أي جدر في المطبخ (تنهار
باكية وتجلس)

سارة

نورا

(بحنان تمسح عليها وبكل تعاطف) زين وشللي يخليج مستحمة هالوضع ؟ !

أنه يا سارة مب بين ناربين على قولتهم أنه وسط النيران نار العيشه مع هالنوع من
الرياييل ... ونار سمعتي باجر بين الناس لي قالو تطلقت .. ونار ... مستقبل هاللي في
بطني ... أش ذنبه باجر أبي الدنيا يلقي أمه وأبوه منفصلين ... وانت عارفة أثار انفصال
الأبو والأم على الأطفال الأبرياء .. لكن الله كريم هلي يصبروني كلما اشتكيت لهم ...
قالولي ... اصبري ... باجر لي ياته عيال بيتغير ... الرياييل جذبه ...

سارة

نورا

يعني إنتي حاسة أن نظرتة بدت إتغير ... ولا معاملته

المستشفى رافض يوديني ... أمس بغيت أموت راح يا بلي اللي تبيع في
الصيدلية وراء بيتنا ... يوم جافتني مسكينة قالت له ... مرتك مب مريضة ..
هاذيه الطلق بدا معاها لازم ألحين توديه المستشفى ... ممكن تلد اليوم ولا باجر
بسرعة ودها ... قالها ... زين .. إبلين الباب يله مع السلامة .

سارة

نورا

عدل عيل ... أمي جافت أمج بالصدفة يوم الجمعة قالتها نورة في المستشفى
بتولد ... أمج ما تدري أنج لين ألحين في البيت .

أنه متصلة إياها في الليل .. يوم ركب الفيشة ... أمي على نياتها لين ألحين

عندها أمل فيه ... وهذاني الألم من أمس أيبني ويروح ...

ساره

عيل وين بيوديح تولدين !؟

نورا

يقول في البيت .. ما عندي نسوان تطلع بره وتولد في المستشفى ... خايفة يا

ساره يصير فيني شيء .

سارة

هاذي زوجج وين عايش في العصور الوسطى... كلنا مزوجات ما نشوف حد يعامل زوجته

هالشكل... أنه تصدقين... مسكين لي قعدنا يومين في البيت قالي ... ما ملتوا إنتو قوموا نطلع ... يا

رحنا الشاليه .. يا ودانا مطعم نتعشه...

نورا

أنه آخر مطعم دخلته مطعم الجامعة ... (تحاول تغيير الحالة) تخبرين سارة الجبس اللي

يسوونه محشف جنة قلامه ... تذكرين يوم كتبت به رقم تلفون بيتكم .. طلع الرقم أصغر (

تعود للحالة) آه أنه بس اللي طلع حظي دامر ...

سارة

زين ما حاولتي مثلاً تقنعينه إنج تشتغلين وراتبج بينفع

البيت

نورا

انه باب الحوش ما قدر أوصله ... تقولين يخليني أشتغل

سارة

يمكن الفلوس شوي تغير رايه .

نورا

لا .. من ناحية الفلوس هو مب محتاج ..

سارة

هو تاجر عود يعني

نورا

لا مب عود لكن هو تقدرين تقولين متوسط ...

سارة

شيشغل إهو ؟

نورا

أعمال حرة ... في الأسهم يشتغل .. وأكثر شغله في البورصة .

سارة

يعني متعلم فاهم

نورا

ما كمل حتى الإعدادية تعليمه كله يقول من كتاب بوخلف الصمي على قولته

كتاب حاطة في شنطته ويدور به ... ما دري منهو بو خلف الصمي ذيه وعلى

قولته إنه إنسان عصمامي ...

سارة

شنو ؟

نورا

قصده يعني عصامي ... جوفي وين سامعها وحفظها جذيه عصمامي ... وتقولين

فيه شي في الدنيا يقول ما عرفه مستحيل كلشي يعرفه هو

سارة

أصحاب عقدة النقص دائما جذبه يسوون أنفسهم فاهمين في كل شيء ... (ثم بعد لحظة صمت) والله ما توقعنتج عايشة جذبه يا نوره ... عاد انتي اللي كنا متوقعين لج مستقبل ... ما تستاهلين ... (ثم فجأة كمن تحرضها بسؤالها) زين معقولة بتعيشين طول عمرج مع واحد بها العقلية ... لازم ... هـلج يتدخلون ويأثرون عليه ... عشان يعاملج صح ...

نورا

(تقوم بكتابة رقم تلفون على ورقة قربها) أبيع بس ولي يسلمج تتصلين بامي هاذي رقمنا في البيت ... قوليلها بس الحقي على بنتج أكبه في البيت ورييلها مب راضي يوديها المستشفى .

سارة

(كأنها تلومها) إنتي في الأساس ليش وافقتي عليه ... خاصة إنه انه سامعه ... هو أكبر منج وايد ...

نورا

يعني ما تعرفين العادات والتقاليد ... خاصة لما يشوفون الريال غني يصير بعد التمسك بالعادات والتقاليد أقوى .

سارة

يعني يقرب لكم ؟ !

نورا

من أهل أبوي ... وحتى لو كان لي رأي في الموضوع يا سارة لا يمكن يخطر على بالي إن فيه إنسان بها العقلية يعيش بينا في هالزمن ... (ثم نورا تحاول تغيير الحالة والدخول في حالة مرحة وعادية إنها تحاول هاربة من وضعها)

نورا

ضيقّت خاطرج بمأساتي ... إنسي هالموضوع وقوليلي إنتي شخارج ... شا الدنيا وياج ... والله زمان يا سارة أبي أعرف أخبارج ... قوليلي ... (تدخل الشغالة فاتيما بصينية القهوة مع علبة شوكولاته)

نورا

تعالى تقهوي

فاتيما

ماما أنه يروح سكر ماي مال حديقة

نورا

زين

(تذهب فاتيما من باب الصالة الرئيسي)

- سارة
مابي أكل شيء .. صبي لي فنيال قهوة . بس بسرعة ياختي تأخرت ... أكيد
الحين الموظفين ينظروني أوقع شيكات رواتبهم ... اليوم آخر الشهر .. مساكين
... لازم أورد المكتب بسرعة ...
- نورا
تشتغلين في شركة .
- سارة
شركتنا ... أنه وزوجي وأخوي .. أخوي طبعا مهندس ماسك المقاولات ..
وزوجي ماسك الإدارة العامة وأنه مستلمة قسم الحسابات المالية كلها عندي ...
- نورا
شركة كبيرة ؟
- سارة
الحمد لله .. إيتدينا بكم مشروع ألحين عندنا أربعمية عامل وموظف .
- نورا
ماشاء الله
- (سارة تنظر للساعة)
- نورا
تو الناس
- سارة
الساعة وحدة إلا ربع ... ولا حسيت بالوقت معاج
- نورا
هاذي موعد بيته سلطان زمانه .. زين قعدي معاي بعد شوي .
- سارة
يا ختي لازم أروح السيارة بعد واقفة جنبها غلط .
- نورا
لا تخافين ... أكيد لدربول ألحين صافها في مكان عدل
- سارة
أي دربول أنا ألحين بروحي أسوق
- نورا
(وقد جفلت خائفة من حصول مصيبة) يعني ألحين إنتي يا يتتي تسوقين بروحج
- سارة
أيه شفيها ...
- نورا
عندج إنتي شفيها ... عنده هو فيها بلاوي ... (مرتبكة) بسرعة ولي يسلمج
- قومي روعي . يا رب ما يوصل ويشوفج ويدري أن اللي كانت عندي تسوق
سيارة بروحها .
- سارة
مب صاحي زوجج هاذيه .. ألحين عرفت ليش صالتكم ديكورها جذيه

- نورا آه لو تدريين شيسي النسوان اللي يسوقون سيايير دفتج وين (تبحت عنها ثم تجدها) هاج .. هاج (تساعدنا في لبس العباءة .. أثناء ذلك نسمع صون هرن سيارة سلطان)
- نورا (إحساس الكارثة) وصل ... طلعي .. واللي يسلمج إذا سمعتي كلمه ولاشي مول لا تردين عليه .. تره لسانه طويل ..
- سارة (مرتبكة) خوفتيني يا نورة ... الباب وين ؟ !
- نورا منيه .. منيه ... تعالي ... منيه ...
- نورا (تخرج مسرعة ومع خروجها تقع عند الباب ثم تجري مسرعة) (تدعو ربها) الله يستر ... يا رب ..
- فاتيمة (تدخل مرعوبة) ماما ليش ما فيه يقول حق رفيج ييجي مع دريول ... هذا ييجي داخل سيارة بروحه ممكن بابا يشوف ألحين ... واجد مشكل
- نورا روعي داخل أنتي ألحين ... (مازالت تراقب) (نسمع صوت سلطان وكأنه يخاطب سارة)
- صوت سلطان تسوقين سيارة .. ما وراج ريال .. تف على الريايل اللي ريلج منهم .. ثور مقرن .. وعندها مفتاح بعد تبطل الباب .. سلط عليها .. اليوم تسوقين سيارة باجر تشربين خمر أمحق ريال .. إذا مرتك تسوق سيارة .. عيل بنتك شتسوي ؟ !
- (نسمع صوت تشغيل السيارة أكثر من مرة .. ونسمع صوت تشغيلها وهي تشتغل ... دليل الارتباك)
- صوت سلطان العيب مب عليج .. العيب على اللي عطاج اللين لو أنه مكانه أعطيج بكس في ويهج .. وأعميج .. وتنتبرين في البيت أمكسحه ... لفي يمين .. يمين ... لفت إرقبتج وما ردت ... يكون طول عمرج تمشين سيده واطالعين وراء .. حاسبي

الطوفة ... الطوفة .. وحاطة مخفي بعد علشان ما يجوفون من داخل ها ...
نسوان آخر زمن .. حاسبي الدرام ... الدرام ... يامال العمى
(صوت ارتطام السيارة)

صوت سلطان وعثره ... الله ما يطق إيعصا .. ولايسه حجاب بعد حجاب وتسوقين سيارة ..
تمويه أشكره تفتكرين الناس إغشمة .
(صوت انطلاق السيارة وابتعادها)

صوت سلطان يله وين ذالفه ألحين .. من يدري عنج وين ذلفتي ...
(يدخل المسرح مفتول الشوارب .. يمشي كالتاوس وبيده شنطة ... وهي ليست
سمسونايت لكنها شبيهة بشنطة السفر لكن صغيرة " نورا تنظر إليه .. ويبعدوا
عليها الذعر والخوف .. وهو ينظر إليها وكأنه وحش يريد أن ينقض عليها)

سلطان (بتقة شديدة) هذا اللي واقف جدامج اسمه سلطان بن شاهين الغيمة .. تعرفين
شنهو يعني الغيمة .. يعني طول عمرهم في العلالي هم وكلمتهم في السما .. إحنا
اللي قال فينا أبو خلف الصمي .. رحمة الله عليه ... لي من حجت الغيمة .. يقصد
القبيلة .. صكت العربان صندوقها يقصد حلوجها يعني قول وفعل تاريخ .. بالعز
تتال إحقوقها .. إهمه أشجرة في السما لكن بالأرض عروقها (ثم بغضب يحدثها)

سلطان قايلج إمية مرة ما تعرفين وحدة تسوق سيارة شوفي تبليغينا ما توطوط بيتنا ..
لأكسر ريلها وأحرونها ... أنه أدش بيتي وحده تسوق سيارة
(مرتبكة) هذي من زمان تـ ...

سلطان (مقاطعا) بعد من زمان ... هادي عيل دريولة قديمة بيه ... يا ويلج إن يات
مرة ثانية ...

نورا أنا أبي أقولك ... هادي من زمان تدرس معاي صديقتي .
سلطان بس ... بس خليها تولي ... لا تيبين طاريها ...

(أثناء حوارهم يقوم بفتح الشنطة وإخراج جهاز تلفون ليقوم بتركيبه في الفيشة ،
فينتبه إلى أنه جهاز آخر)

سلطان يله بغيت أركب تلفون غرفة النوم في الصالة ضايعة الحاسيه
(يعود ويدخل التلفون المتحرك .. ويقوم بتركيب الفيشة ... وبمجرد تركيبها يرن التلفون
مباشرة سلطان يرد)

سلطان ألو (يرد بهدوء شديد متصنع لأنه واثق أن التلفون له)
صوت راضي (السكرتير المصري بفرحة بعد عناء) أخيرا .. الحمد لله سامعني كويس
سلطان أسمعك يا راضي أسمعك قول شعندك .

صوت راضي أنت عارف بقالي ساعة ونص بالضبط باتصل .. من تلفون الشقة عندي .. ما
فيش فائدة .. التلفون عندي بييجيب رنة تلفونكم ثلاث أربع مرات وبينقطع ..
أحاول مفيش فائدة المهم مش لاقى حد يرد عليه ... رحت رامي التلفون القديم
ونازل تحت السوبرماركت واشتريت الجديد ده اللي بكلمك منه ... الحمد لله طلع
كويس ..

سلطان يعني إحنا ما ردينا عليك طلع تلفونك خربان ؟ !!
صوت راضي أه والله ... وأنته عارف يا عم سلطان الحكاية دي مش أول مرة تحصل معاية ... ده رابع
تلفون باغيره والغريبة أن التلفونان ما بتبوزش إلا لما أتصل بيك بيتك ده فيه عفريت
تلفونات ... أصل مش معقولة تلفونكم ييوظ ... إنتو بتجيبوا نوعيات غالية كويسة .. مش
زي شقق الإيجار طبعا

سلطان زين شعندك متصل ...

صوت راضي إيش عندي ما ينفعش في التلفون أنا جايلك البيت حالا
سلطان مساعة كنا في المكتب جان قلت الله عندك

صوت راضي لاء مهو باين أنا سكرتير الغفلة .. فيه حاجات بتحصل من وراية .. وأنا عارفك .
إنته إنسان متهور وعموماً أنا حقفل واجيلك مسافة السكة ... وبعدين لازم تعملي
في الراتب زيادة عشان التلفونات ... تسميها ... بدل عفريت (يضحك) مع
السلامة .

(صوت إغلاق الخط نورا جالسة على الكنبه فيبدأ معها ألم المخاض)

نورا

آه ... آه ... آه

سلطان

(مع الشنطة جالس يراجع بعض الملفات بعد أن يضع على عينيه نظارة يتحدث مع نورا بلا اهتمام أبدا سمعي تراه أنه متغدي بره ... في المطعم ... عاد خوش غدا والله ... ما دري ليش ما تعرفون اطبخون جزيه ... انتو الحريم) مستمر في ترتيب الورق ... والأسهم ... والنقود يعدها ويرصها في بلاستيك .. ويواصل الحديث)

آه ... آه

نورا

سلطان

فاضيين حق الطبخ إنتو .. فاضيين بس حق تحرير المرأة جنة المرأة مربطة ... اللي تبني تشغل واللي تبني تسوق سيارة ... واللي تبني تطلع من البيت .. واللي تبني تهائم في السوق أجوفين الوحدة تمشي باقة عينها جنة ضايح لها شي .. لا بسه برفع نزلي عنج بعد باقتها شقه
(يزيد عليها الألم) آه ... آه

نورا

سلطان

(عادي جدا) قومي دشي داخل أولدي ... المرة اللي تولد ترى أنه بيتها معاي .. أكبه مقعدها في الملحق اللي بره قاعدة بطشتها وعدتها تنتظر ... قلت لها خلع سطمباي تقولي أخاف أطول قتلها ... لا لا ... مكسمان ساعة نص ساعة .. قومي داخل لي صارختي بتي أهيه أنه قايلها لي سمعتي صراخها تعالي داخل يله روجي بس ارفعي صوتج في الصراخ .

نورة

(دون وعي تثور بهستيرية) شنهو إنته مجرم ... حرام عليك اللي تسويه فيني ... أنه إنسانه لي مشاعر وأحاسيس مثلي مثلك ... (صارخة أكثر وسط انشغاله هو) وين عايشين إحنا في عصور الظلام كفاية تسلط .. وكفاية جبروت إنته ما عندك إحساس .. قلبك حجر ... ظالم ...

سلطان

(يعيد الأوراق في الشنطة وينتبه الآن لما كان يدور) ممكن تعيد الكلام اللي قلتيه ... أنه ما كنت مركز معاج ... بس جني سمعت كلام غلط ... (غاضبا) اشقلتي يا حرمة (تنتبه لنفسها الآن وتعود إلى شعورها) ها ... (تحاول أن تسيطر على نفسها الآن وتمسك أعصابها ...) ما فيه شي ... أنه بس أبي أعرف ليش ما تبني توديني المستشفى (تقولها بشيء من الضعف والهدوء الآن)

نورا

سلطان

من أول ليلة في الزواج من أول ما دخلوج علي .. وقبل ما يطق لساني لسانج ... بالحجي ... أول كلمه قلتيها لج أنه طول عمرج ما تسأليني عن شيء ... أنه ريال ما تسألني مره أنه ما أنسى حتى أنكسر أول كلمة قلتيها إنتي ذيج الليلة قلتي لي دمك ثقيل ... كنتي إتغشميرين يعني أنه أوديج مستشفى ... أنه ما عندي نسوان إتكشف عليهم ريايل فيه طبيبات نسوان في المستشفى واللي ينظفون الحجر نسوان ...

واللي بييون الأكل نسوان... لكن فيه رباييل إيون أيزورون أهاليهم وبعضهم يضيعون أرقام الغرف اللي فيها حريمهم... ولا يغلطون في الغرف... أيون يبطلون الباب بالغلط... باجر يه ريسال وبطل عليج الغرفة بالغلط ... ما غير شافج ... أنه أرضه واحد يشوف مرتي .

نورا

الولادة في البيت مخاطرة... على حياة ولدك وحياتي ما تخاف الله فينا...

سلطان

مب أول وحدة تولدين في البيت ... لولين قبل وين يولدون نسوان لول .. الوحدة منهم جنبها خطوة... قاعدة في الحوش مع ربعا تقولهم دقيقة باروح أولد وباييككم مب مثلكم دلح ويتقلون لول وراء العشب والمائي تولد الوحدة فيهم على ناقتها ولا على حمارها ...

نورا

تبي تقنعني يعني ... لول مساكين ظروفهم صعبة ما عندهم شيء ... لو كانت عندهم مستشفيات بيخلون الوحدة تولد على حمار يا... (تتدارك) سلطان

سلطان

إنتي مستهينة بالولادة فوق الحمار بوخلف الصمي .. يقول كانوا بعض الحريم يتمنون يولدون على حمار ... لي دشت شهرها التاسع قالت حق ريلها روح هاتلي حمار ... ليش عاد يقول الصمي . يكون لي تهاوشت معا ريلها عقب ولادتها وهي ما تقدر عليه .. تتادي ولدها تقوله تعال يا ولد الحمار ... كله هاذيه مسجل عندي في الشنطة هنيه في كتاب بوخلف الصمي .. ويقول بعض اللي ينولدون على الحمير يصيرون أذكاء .. لكن الأكثرية يطلعون عيال حمير وينكتون عليهم .. سمعتي نكتة لثنين المولودين على حمار ... (يقول نكتة عن الغباء)

نورا

(بشيء من الاحتجاج الهادئ أو تحاول أن تكون هادئة) ... من تزوجتك لين أحسن كلشي أنه أبغيه ما يصير وكلشي تبنيه إنت يصير

سلطان

هذا الصبح الرجل سيد البيت إنتي إلا حرمة ...

نورة

يعني إنته تشوف الرياييل جديه يعاملون نسوانهم .

سلطان

هذيله بعد تسمينهم ربايل .. (يستغرق في الضحك وكأنه يلقي نكات) لي به يدشر مكان يبطل الباب حق مرته ... وهو وراها مثل الجلب ... هاهها ... وإلا بعضهم لي به يسوي مشروع وإلا بيني البيت يقول حق مرته شرايح ... ياخذ شور مرته ... هاهها هاذيلة بعد أهون تعالي حق اللي يسوق ومقعد مرته جدام حذاه ... لاحيا ولا مستحا ... عيل السيتات الورانية من يقعد فيها هه هاهها ... لعلمج إنتي الحريم يتمنون يعيشون مثلج ... إشقا صرج ... عايشة في فيلا ما يحتاي وكلشي تطلبينه وتحتاجينه إبيج لي مكانج ... مرتاحة خياطة تيج البيت تفصل لج ... كل الملابس اللي تبينها بتيجي وحده البيت تاخذ المقاسات وتروح السوق تشتري لج ... تطلبين ألف أعطيح ألفين ... تصرفين على هالج ... توني باني مطبخ أمج الخارجي أبوج قال بيبي مطبخ ثلاثة متر في ثلاثة متر سويته له ست في ستة ... قتله عود خلو حتى الشغالة ترقد فيه قال ما عنده شغالة .. طلعت له فيزا وبيناهها وقلت حق راضي السكرتير كل شهر طلع لها معاش من عندي .. وبيت خالج هذا انتي كل شهر إمطرشه له بيكم أغراض المطبخ ... خير ... خير ...

نورا

(واضح أنها محبطة من كلامه) أنه أتكم عن أشياء مهمة وأنتا ما في لسانك غير الفلوس

سلطان

ما فيه أهم من الفلوس في الحياة .. تخلي الواطي عالي ولي شحت يابت العالي واطي ... هاذي الأمور إنتوا الحريم ما تفهمونها عقولكم ناقصة .. يله دشني داخل وراج ولاده ...

نورا

كل شئ على كيفك ... مب إنسانة اللي عايشة معاك ... جارية

سلطان

شفيها الجارية... تصدقين إنتي كلام الأفلام... لي أصرخت الوحدة في ويه ريلها ... (مقلدا) أنا مش جارية عندك زمن الجواري انتهى ... (لها) جواري بس جذبه تقولون .. إنتي تعرفين شي عن الجواري ... أنه ألحين باسمعج بو خلف الصمي شيقول رحمه الله عليه ... (يفتح الشنطة ويخرج كتاب قطع متوسط يقرأ منه) بو خلف الصمي ما خلا شي ما قاله أو ما كتب عنه (يبحث) الجواري ... الجواري ... لا الجواتي ... شفتي حتى الجواتي كاتب عنهم ... هه ... جواتي المشي ... جواتي الركض ... جواتي الهوشة ... ماشا الله عليك يا بو خلف علامة ... هه الجواروي يقول بو خلف أراد الأمين ابن هارون الرشيد هارون الرشيد هذا تاجر عود ... من الكبارية يعني ... وهذا أمين ولده ... أمين ولد هارون يقول أراد أمين أن يشتري جارية أعجبه اسمها " بذل " من جعفر بن المعادي . لكن جعفر

رفض وعيا ... فترس له أمين قارب من ذهب ترس له لنج كامله ذهب شوفي الجارية ... لكن جعفر ما قبل .. ولم يفرط فيها وقال لأمين شوفي بو خلف حاطها بين قوسين مهمة .. قال جعفر (لاء أبيها... أبيها...أبيها) ثلاث مرات... أيه عزيزة عليه جارية هاذي مب شيء بسيط ... هه وسمعي هاذي عشان تعرفين ... يذكر المسعودي ... يعني المسعودي قائل حق بو خلف الصمي ... شقاله عاد ... أن بعض النخاسيين توغلوا في بادية تركستان واشتروا الفتيات من آبائهن ونقلوهن إلى سمرقند ... شوفي يودونهن سمرقند بعيد درب بعيد وتعب .. وفي سمرقند يقومون بتربيتهن ورعايتهن إلى أن تبرز معالم الجمال فيهن فاهمة شيقصد يعني ياخذونهن توهم سطحه هنية (يشير للصدر) بعد شيطان بو خلف يغزر في الحجي ... وبعد ذلك يبعونهن إلى أسياذ بغداد والبصرة والفسطاط... بأغلى الأثمان... شفقتي هناك في سمرقند إيمعونهم ويربونهم ... مثل المزرعة يعني مزرعة بنات يسوون... شقا وتعيب... الجواري . سهل بس الوحده تستوي جاريه منيه والدرب... تقطون بس حجي ما تعرفون قيمته...

(تشعر بالإنهاك) حرام عليك ...

نورا

(مقاطعا) حرام علي هذا تاريخ مذكور

سلطان

(بإصرار) حرام عليك إنت بتذبحني... أنه بيصير فيني شي وانت السبب ... (تنفجر فيه) شها الحظ الدامر الي يابك في طريجي ... كان يوم أسود اليوم اللي سمعت فيه كلام هلي ... لكن الله يسامحك يا بيه ... الله يسامحك يا بيه

نورا

جب وعن الحجي الزايد ... ذلفي داخل يله ... روجي أولدي يله ... دشني داخل أولدي يا الله حجرتج ..

سلطان

(بتوعد) بادش داخل لك بجوف ...

نورا

" تذهب .. للدخول إلى إحدى الحجرات "

(بخاطبها) أنه تهددني مرة... باجوف أنه ولا إنتي خلي عنج لعناد... لاندلج بيت أبوج... وأخليج معلقة لا مزوجة ولا مطلقة... ما خربكم إلا هالتلفزيون ولا هالفضائيات الدامرة ... والحين بعد قاموا يسوون

سلطان

لهم برنامج بروحهم ... للنساء فقط ... خديجة بن قنة ... إحنا ما قد سمعنا أبو إسمه قنة هذا أكيد اسم أمها... إيه (يخاطب حيث اتجهت نورا) عايشة مع أمها بروحها في البيت خذت راحتها تطلع وتتبي بمزاجها... وصارت مذبذبة... ما فيه ريال يحكرها في البيت... يوقفها عند حدها ... قنة شبتسوي لها مسكينة ... مرة مثلها ما تقدر عليها... وكلهم جذبه ... إيمان بن نورة ما تقدر عليها نورة ... الريال غير ... بيقيدها في البيت غصب ... ورفجتهم ريم صالحة ... تلقاها طول يومها في الجزيرة ومخيلة صالحة المسكينة بروحها في البيت لكن لو صالحة ونورة وقنة يركبون نكسي ويروحون الجزيرة ما نبي بناتنا يطلعون حق خلق الله ... لو يرجعونهم البيت عن طريق المحكمة ... يقولون لهم إحنا ربيناكم والحين كبروا ما تقدر عليهم... بالقوة القاضي يرجعهم البيت يقولهم روحوا هاتوا أوراق موافقة من ولي أمركم... كتبوا أساميهم باسم أمهاتهم واقعدوا ... لا بعد قاموا المذيعين يقلدونهم ... يكتبون أسامي غير شكل ذاك كاتب محمد كريشان ... زين حظ اسم أبوك وذاك شاف عمر الشريف مشهور قال عدنان الشريف ... وسامي حداد ... زين الحداد ماله اسم شفيها لفي قلت اسمه مب عيب ... (ثم لها) أدري بج ألحين بتقولين أكيه ليلي الشايب قايلة اسم أبوها ... شبيسوي الشايب ... ما فيه شدة يركض وراها ما تخاف ... خربتكم هالمحطات ...

" نسمع صوت جهاز التوك باك فيتجه ناحيته "

" في نفس اللحظة تدخل فاتيما من المطبخ باتجاه الجهاز "

سلطان خليه خليه عنج ... من ؟

صوت راضي : أيوه يابو شاهين أنا راضي ..

سلطان حياك ... حياك

صوت راضي حياك حياك فين ... مش شايف هنه مجلس ... مش كان قبل كده فيه مجلس ...

سلطان هدمناه نبي غيره... أكبر من لولي... نش نش داخل تعال في الصلاة... (ثم لفاتيما) سمعي... روعي حطي شوبة فواكه وغرشة ماي ووديا الملحق اللي يم لستور فيه حرمة كبير هناك قاعدة ودي لها... إذا قالت لج ماما مافيه يولد قوليلها بابا يقولج بعد شوي... وقوليلها بابا يعطيح فلوس زيادة ما عليج...

إذلفي يله

فاتيمما

(تبالغ في الاحترام والانصياع وتحذثه وهي تتحني له وكأنها أمام ملك) حاضر سيدي..
حاضر عمي... أنه تحت أمر مال إنته شيخ...
(سلطان يشعر بالزهو فينفخ صدره تخرج هي ثم نرى راضي خلف باب الصالة ليدخل
راضي وهو يضحك)

راضي

أي حكاية العجوز دي اللي قاعدة بره... بتسألني بتولي حتولد إمتة... أنا عايزة أولدها وامشي مستعجلة
... وإيه بنة اللي حتولد عندكو معزة ولا بقرة ... وبتسألني أنا ليه هو أنا الراعي بتاعكم... دي يعني
متخصصة كويس في المعيز والبقر ... أصله مش أي حد يعمل الحكاية دي ... إسألني أنا.. لما كنا في
البلد قبل ما نيجي القاهرة ... كنت أنا بأشرف على الناس دي لما بيحوا يولدوا الجاموس والبقر اللي
عندنا .. دي بنة حتاخذ منك كم دلوقت .. ياريتك ثلثي أو سألتني كنت أنا ولدتها لك ببلاش... المسألة
سهلة... عايزة بس خفة إيد ... وقلب جامد ... بثولك إيه لو ما اتققش معاها مشيها ... وأنا حولدها
إجري مشيها بس ... ومالكش دعوة ... حولدهالك ببلاش بدل ما تدفع... ودي ممكن تعملها مشاكل ...
أنا عارف طريقتهم ... أصل دول واخدينها بزنس ... مايبيرحموش ... أنا بنة حولدها بطريقة حتريحها
أوي مش حتص

سلطان

(متضايقا) بس بس يا راضي هاذي جاية تولد البيت .. إحنا ماعندنا بقر ولا غنم .. البيت
بيولد

راضي

(مندهشا) البيت حيولد .. حيجيب إيه شقة ... حلوة دي ... (يقول له نكتة سريعة)

سلطان

إنت غشيم أقولك البيت بيولد يعني الحرمة ...

راضي

حرمة أيه دي اللي حتولد في البيت

سلطان

خلاص عاد خلنا في شغلنا .. حرمتي بتولد في البيت خلاص ... قول شعندك !؟

راضي

لا إستنتي شوية ... سيب الشغل دلوقت ... الموضوع ده ما يمرش كدة ... حرمتك قصداك
يعني المدام !!

سلطان

أينعم

راضي

شوف بنة صحيح أنا سكرتير في المكتب بس اللي يشفع لي أتكلم في الموضوع ده العشرة
اللي بينا والعيش والملح وإن احنا أصحاب ... وصحاب أوي .. وانبته دايمما بتثولها أن إحنا
إخوات .. عشان كدة مترعلش مني .. وأنا من زمان نفسي أكلمك في الموضوع ده ... ليسه
بتعامل مراتك بالطريقة دي .. بتعاملها بطريقة قاسية

سلطان

المره في شور الريال ... وعمرها ما تعصيه في شيء والمره لها البيت وبس تبيني أسوء
مثلك (يضحك كأنه يقول نكتة) تيود مرتك جذبه في يدك وتمشي في السوق ما تستحي بسر
حد يشوف مرتك

راضي

واستحي ليه مدام مراتي إنسانه شريفة ولايسه محتشم وحاطة الحجاب

سلطان

ويها مكشوف .. الراح والياي يطالعها

راضي

هو وجه المرأة عورة ... ده الإسلام ... دينا ... يا أخي سمح للمرأة تكشف عن وشها
والكفين .. كمان حتفتري على شرع ربنا

سلطان

إنته سكرتير في المكتب مب في البيت

راضي

ما قلنا بلاش زعل الست دي يا سلطان إنسانه زينا زينا المرأة نصف المجتمع ... وفي نلس
بتؤول لك لاء المرأة هي كل المجتمع ... لأن لو قلنا المرأة نص المجتمع وهيه اللي بتربي
وتصنع الرجال ... يبقى النص ده هو اللي بيعمل النص الثاني بيئة هو الكل في الكل ... (
للجمهور) دي عايزة سقفة ... عشان تعرف المرأة دورها أكبر من دور الرجل في بناء
المجتمع لأن هيه اللي تربي الرجل يا أخي إيه اللي إنته عامله في مراتك .. ده سجن لا
بتشتغل ... لا بتخرج .. ممنوع تنفسح ... حتى الولادة في البيت دانته قاضي على شخصيتها
خالص .. دانته دابحها دي حتربي أولادك .. إزاي وحدة مسجونة وما لهاش شخصية عايزها
إطلع ولادك ولاد كويسين طبيعيين

سلطان

يا بوي اسمع ... خل عنك هالحجي .. المرة إذا ما تكسر راسها تركبك ... إنتو تسون نفسكم
رياييل .. نسوانكم يسيرونكم .. أنه المرة مول ما أعطيها ويه

راضي

(بقصد) أمال يعني النسوان اللي بيجوا المكتب المندوبات أنا بشوف يعني إنك بتديهم ويه
أوي .. ياراجل ... امبارح المندوبة اللي جت .. قايم بنفسك تعمل لها الشاي وحاطط لها
ورقتين كلينكس كما تحت الكباية .. عامل لها جرسون فايف ستار . والنعومة اللي في الدنيا
كلها ... يا راجل أما جت تقعد رحت صاحب لها الكرسي ومقعدها . أيه الأتيكيت ده ...

سلطان

هذا ... هذا ... هذا ... شغل

راضي

شغل إيه مش دي برضه ست

سلطان

إيه ست

راضي

واللي عندك في البيت مش ست

سلطان

لاء

راضي

أمال إيه

سلطان

هاذي زوجتي ... فرق فرق كبير لادخل ذي في ذي رحمة الله عليه بو خلف الصمي يقول .. مع زوجتك لا تمزح ولا تضحك ولا تخليها تضحك جدامك أبد .. حتى ما تضيع هيتاك أمامها

راضي

محدث حضيحك غير أبو خلف الصمي بتاعك ده ... وكتابه الهايف اللي شايله معاك في الشنطة . وما بستغناش عنه ... دنا بتهيألي ممكن الشنطة دي تتسرق والكتاب فيها يسروح طالع منها وجايلك جري ... مين أبو خلف الصمي ده

سلطان

إيه اللي ما يعرفك ما يثمنك

راضي

دنا نوع من الفضول قعدت مرة أفر في الكتاب عمال أسمعك أبو خلف وأبو خلف ... قلت أشوف كاتب إيه لقيته متكلم عن كل حاجة في الدنيا .. وعامل فصول وكل فصل بينكلم فيها عن حاجة .. إلا الستات مالهمش ولا فصل ... ده عامل للرجاله عشر فصول .. وما بجيش سيرة المرأة إلا بالتهزئ والحاجة والوحشة ... ومركز أوي على حكاية الجواري طب زي ما تكلمت عن الجواري إتكلّم عن النساء البطلات عن أمهات الشهداء والشهيدات .. هيه المرأة عند بو خلف جارية ويس .. ده عامل حتة فصل مسخرة

سلطان

عن الريايل

راضي

لاء

سلطان

عن النسوان

راضي

لاء

سلطان

عيل عن من ؟

راضي

عن اللي نص ونص ده قايل عنهم قواله ده بو خلف باين عليه بتاع ... أي كلام

سلطان

أعرفه أعرفه ساعات يصير سرسري .. لكن ماشاء الله عليه علامه ... إنته كفو توصل مواصيل بو خلف

راضي

أنا ماليش دعوى بأبو خلف أنا ليه دعوى بيك إنته أنا حاقفل الموضوع ده معاك بكلمة بس ... إتق الله في مراتك يا سلطان

سلطان

(يريد إنهاء الموضوع) زين إنته ألحين فيما يخص الشغل شغلك يابني ؟ !

راضي

أيوه نرجع لموضوع الشغل ... دايمًا باقولك ما نتسرّعش في اتخاذ أي قرار ... إسأل الأول ... قبل ما تتخذ أي قرار إيه الالتزامات اللي علينا ... خلاص ... أقنعك أبو منصور ...

رحلت محول الفلوس كلها بره ...

سلطان

(بسعادة) تدري بو منصور شيقولي ... يقول الأرباح هناك مب كل شهر ولا كل أسبوع
ولا باليوم يومين ساعات في خمس دقائق تريح ملايين ... يقول حركة عجيبة

محدث قال غير كده يا بو شاهين ...

راضي

سلطان

بو منصور انتة عارفه خبير في الأسهم قالي بسرعة بسرعة يله دش .. والشركات اللي
دخلت وياه فيها يقول متوقعين باجر عقب باجر أسهمها ترتفع السما ... والأرباح ملايين

راضي

سلطان

طيب والالتزامات اللي علينا هه .. انتة ... ماسبتش سيولة في إيدينا نقدر نتحرك بيها
(فرحا جدا) السيولة بتتي ... خلها على قولة بو منصور إتحرك عبر المحيطات بترد
لفلوس دبل الدبل ..

راضي

إنتة عارف النهاردة كانت في إيدي صفقة أسهم كنت حتطلع منها بنص مليون أرباح في
نص ساعة ... بس فين الفلوس .

سلطان

وقف الحين البنزنس في الداخل .. شوي ... خل لفلوس مسافرة بره شوي تشم هوا وتغير
جو يكون ترد صحتها أحسن ... هاهاها ...

راضي

سلطان

كنت تسبب لنا على الأقل مليون نحرك بيه المكتب
ما صار إلا الخير ... إنتة لو سامع كلام بو منصور جان طار عقلك مثل ما طار عقلي

راضي

ما أنا عارف ... بس أنا بقول الكلام ده ليه ... عشان مرة ثانية تخليني في الصورة عشان
ما ارتبطش أنا مع الناس ويبقى شكلنا وحش ... إلا إذا كنت مش محتاجلي قلبي ... مش
حازل

سلطان

يله عاد لا تكبر الموضوع ... أنه اللي سويته هذا في مصلحة المكتب ومصلحتنا كلنا
(نسمع صراخ نورا من ألم المخاض)

راضي

(مرعوبا) إيه ده فيه إيه ...

سلطان

(يدفع به للخارج) إطلع إنت ... إطلع بسرعة بس

صوت نورا

آه ... آه

راضي

ربنا يستر حارج يا جدع .. ما تزئش وديها المستشفى حرام عليك دي ممكن تشتكيك في
الأمم المتحدة

سلطان

إطلع إنتة بس إطلع ...

(يخرج راضي)

صوت راضي

حاسبي يا ست هو فيه إيه ...

صوت الأم

وخر إنت بعد ... حرام اللي تسويه في بنتي ...

(تدخل المسرح .. سلطان ببرود تام بينما هي تشتعل غيظا)

الأم

(بطريقة العجائز العفوية) وه حسبيه الله عليك يا الظالم .. وين عايش انتة .. صاحي لو مينون .. ما صدقت أنه يوم اتصلت رفيجتها سارة تقولي إلحقي على بنتج ... منغص عليها عيشتها لا تطلع .. لا تروح لا تزور أهل حاكرها ... حسبيه الله عليك ... حتى المستشفى بعد ما تبي توديتها ...

صوت نورا

آه ... آه

الأم

أيه على بنتي ... إشناوي على لبنيه بتذبجها ...

(هنا تدخل العجوز الولادة مسرعة ومعها طشت غسيل وكيس أعشاب)

العجوز

وين هادي اللي بتولد ..

الأم

منهي ذي بعد هالساحرة

سلطان

هادي الولادة

الأم

من صجك إنتة .. أيه عليج يا بنتي

سلطان

بنتي وبنتي وبنتي .. خلاص بنتج عندها زوج مسئول عنها .. وهو بيتصرف

العجوز

بسرعة يله .. وين محطوط هادي حرمة وين محطوط

الأم

سكتي إنتي بعد .. ما عندج سالفة ... وين محطوط ووين محطوط كارتون هي لو جلبة

العجوز

إنتي مالج خص أنه يايه قبلج ...

سلطان

هادي أمها لاتخافين .. دشى داخل سيده .. بتلقينها في الحجرة

العجوز

عاد شوف .. إنتو عطلتوني .. إذا ما تولد اليوم أنه باروح مب فاضية أنه

سلطان

لا لا أقعدي عندها .. من ناحية الفلوس اللي تبينه بنعطيج ...

العجوز

معليه تولد باجر .. عقب باجر .. مافيه مشكلة ...

(تذهب للداخل)

الأم

آه ... أيه على قلبي المحترق ... ليتني خليتك مثل الجلب أتملحس عندنا في البيت ... كل

يوم طاق الويه وياي ... باحطها في عيوني وباحطها في عيوني ... آخرتها تاخذه وتحطها في

جهنم ... عسا جهنم يقطونك فيها رويسى

سلطان

أنه مخليج تسبين براحتج لأنه مب أصول أرد على مرة عوده رحمة الله عليه يقول ...

بوخلف الصمي ...

الأم

صمية أنشاء الله ... أرقعوك إياها على يابهنك ... وما ترقعت ...

سلطان

زين بس بس لا تعورين راسي ... أنه باروح أرتاح فوق واكيه بنتج عندج ...
(يتجه ناحية السلم)

الأم

أقعد تفاهم مع الريايل أبوها وخالها وأخوها يابين وراي
(نسمع أصوات من الخارج)

صوت الأب

يود خالك إنت بس لا تهده ...

صوت الخال

منبطه جبدي أنه

صوت ناصر

خله يطقه ... وأنه مستعد أرضخه معاه ...

الأم

هذ همه وصلوا

سلطان

أنه ريال مب فاضي ... (يتجه للداخل دون اهتمام)

(يدخل الأب وخلفه الخال وناصر ممسكا به)

الخال

(بمجرد دخوله هائجا وغازبا يتحدث كأنه موجود) ما تستحي إنت ما تستحي مطلع مرايلك
على بنية مسكينة ... ناصر أي صوب قاعد خلني أعطيه طراق ... مزوجينك بهيمة إحنا تف
على هالويه

الأم

أخوي ... هو محد ... من عليه تزعق ... راح يرقد على قولته يرتاح ... عساه ما يجوف
الراحة ... الي حكم عليها حكم قارقوش

الأب

مب على كيفه ... صبرنا عليه وايد ... عاد ما توصل لي هالمواصل

ناصر

أنه من أول جفته عندنا .. قتلكم هذا الشخص مب عاجبني ومن زمان أقولكم وأصر عليكم
أبي سيارة .. ألحين لو أنه عندي سيارة ... جان من زمان داعمة ومكسره ...

الأم

تروح وترد أنت بعد على هالسيارة ...

ناصر

ما بيها لي أنه ... أبي أدعنه فيها ...

الخال

وشحقه السيارة ... أبوك عنده هذا الطراد اللي يدش فيه البحر بونفر ... اللي كل يومين
منقلب ... يوديه معاه البحر ويغرقه ويفكنا منه ... شغرقه والله طراد بو نفر أركبو فيه نفرين
إغشمة وخلص

(تدخل نورا)

الأم

ارتاحي يمج شحقه قايمة

نورا

خف شوي الألم .. خلّه ينادونه يمه ويتفاهمون معاه بسرعة لازم أروح المستشفى ... أنه
خايفه يمه

(تدخل فاتيما قادمة من باب الصلاة حاملة سله بها ملابس من حبل الغسيل)

الأم

خلي السلة وروحي حق بابا ... قوليلة بسرعة تعال بيونك تحت

ناصر

قوليله إن ما بيت بتترضح في سريرك

الأم

(بعد أن ذهب فاتيما إلى أعلى وكأنها تخاطب سلطان) تعال اطلع عاد مب تتخش

الخال

(رافعا صوته) تعال واجه الرجال ...

نورا

والله بيه ... ويا خالي بيتوا في الوقت المناسب ... أنه ما بي منه شي ألحين مول ... بسر
يوافق أروح المستشفى ...

ناصر

ما يوافق ... بنراويج شبنسوي فيه ...

الخال

إن ما رضخنا به بتقولين خالي ما قال بينحط هنيه وبينطق ويتولج عاد ... لا تخاف إلا من
طق العمي ... أقل ما فيها بطة عين ولا كسر ضلع معروف طق العمي بالوصف

نورا

خالي ... عاد أخاف يصير فيه شي وعقب تسوون حق نفسك بلوه ...

الأب

إحنا مب طاقينه طق ذبح ... قتل ... بنطقه طق تأديب

الخال

الطق اللي يخليه يحس أن وراج رجال ...

نورا

أعرفه يا بيه ... مب ساكت ممكن يشتكي عليكم ويدخلكم السجن

الخال

لا تخافين ... بنسويله خطة إحنا ماعليج ... بنطقه وينطلعه هو الغلطان ... هو واحد واحنا
ثلاثة ... مب كفو ...

ناصر

اخ بس لو عندي سيارة ...

الاب

(لنورا) سمعي خلي الشغالة داخل مول لاتي الصالة اشغليها عنا شوي ... عشان ما
جوف شي وباجر بعد تروح تشهد علينا ...

الأم

انتو أول ابتدوا معاه بالحجي .. وبالكلمة

الخال

إنتو لا تدخلون . إحنا ربابيل وينسنعه ...

نورا

(يعاودها الألم) آه ... آه ... يمه يوديني ما قدر

الاب

وديه خليها ترتاح داخل فطام ما تجهزين اغراضها حق المستشفى...

الأم

يايب لها وحده تولدها في البيت ... عايشين في أيام الغوص إحنا إلا أطردها

الأب

خليها تولي عنيج هو يايبها ... هو بتكفل إيها ... خليج مع بنتج ... كلها نص ساعة
وخالصين معاه ... الثور ...

(تعود فاتيما من أعلى)

فاتيما

بابا يقول ألحين بيحي (تأخ السلة وتوجه للداخل)

الأم	(وهي ممسكة بنورا متجهتان للداخل) لا طولونها معاه
	(يبدوا سلطان من أعلى السلم يتلصص ويتابع ما يدور)
الأب	يا بو علي ... خلنا صاحين أنه أعرفه خبل ولسانه طويل وعصبي وشيطان ... يمكن يتغد بنا قبل لا نتعشا به .
الخال	يخسي إلا هو ... إذا هو من عيال الغيمة إحنا من عيال القوع أخذه من فوق وأغطسه معاي ... وأهده قوع
سلطان	(بقصد) مب كفو
الخال	(يعتقد أنه ناصر) نف عليك وعلى شكاك يا الجلب تقول حق خالك مب كفو ... كبرك أنا ...
ناصر	ما تحجيت أنه ...
الخال	عمي أنه لكن أسمع ... ولعلمك العمي يسمع أحسن من المفتحين
الأب	ولا نطق ... يتراولك بس ... إسمع ... إحنا ما نبيه يسوي لنا بلـوه لازم نستخدم معاه السياسة ...
الخال	شلون يعني ... فهمنا ...
الأب	إحنا نبي نأديه .. بطريقة ما ينمسك علينا فيها شيء
الخال	(فرحاً جداً) بس ... بس ... بس ... اسمعوا أنه عندي خطة
الأب	لا حول هاذي اللي بيفضحنا ... شوي شوي لا تصارخ ياي في الطريق لا يسمعك ... شوي شوي
الخال	(هامسا) هو أول ما يوصل ... ولي قعد
سلطان	(يحاول أن يسمع ثم) ارفع صوتك ما سمعك
الخال	(غاضبا للأب) تحجينا بلحيل قلت شوي شوي تحجينا شوي شوي ... قلت ارفع صوتك ... أنه باسكت بس
الأب	أنه ألحين أبي أعرف من نطق ناصر قلت شيء أنت
ناصر	ولا تكلمت ... إنت اللي تكلمت بيه ...
الأب	أنه ما نطقت ... الظاهر صوتنا في الصالة صالة عوده شكبرها زين قولنا الخطه شنهني
الخال	ناصر يغلط عليه يكون إنه صغير ومندفع .. وتقول أنت هو عصبي بيقوم يطقه .. أنه وأنته جنا نفاجهم لكن ننحز فيها صوب لضلوع ... أنه ... أعرف من وين أيوده من صر صوخ إذنه

(سلطان يصدر صوت كأنه يريد أن يشعرهم أنه قادم)

جنه ياي .. نزل أش

الأب

قعدوا .. قعدوا جنا ننظره

ناصر

(هم يأخذون وضعهم جالسين في الصلاة)

(يمثل عليهم وكأنه يتحدث في الموبايل على السلم)

سلطان

سلطان

يعني متوقع الأرباح في حدود مليون دولار ... تقريبا أربعة مليون ... يا ريال من كثر
الفلوس الواحد مب عارف شيسوي فيها

(هم يستمعون للحوار .. بينما الخال يقوم بحركة تشير إلى حظه العاثر بأن يضرب بيده على
وجهه !)

يا ريال مليت من السياير الهدايا ... أمس طرشلي سيارتين شبح هدايا ... مب عارف وين
أوقفهم

سلطان

(ناصر يهتّم بهذا الحديث أكثر منهما ... فينهض وكأنه يتمشى ناحية السلم ليتابع الحوار دون
أن يشعر به أحد)

سلطان

وحده مثل ما نقول ممكن تناسبني ... عائلية ولونها أسود لكن الثانية مالة شباب ...
(يزيد انتباه ناصر للمتابعة)

سلطان

باب واحد ... تيربو ... لا ويقولك المصنع ماطلع غيرها ... هاذي الوحيدة في العالم ...
وخوش لون عليها ... لا وشوف بعد الشيء العجيب اللي مسوينة فيها ... الألمان شياطين ... مركبين
فيها جهاز بس حق المسيرات الرياضية ... لي فاز فريقك في الكاس أو الدوري تضغط الزر وتبرمج
الجهاز باسم الفريق يقوم بروحه بطلع أغاني خاصة للفريق ... تبي السد .. العربي ... على طول (ناصر
مشدودا ينظر لسلطان وكأنه يريد أن يسأله سؤال)

سلطان

(بذكاء يجيب عليه) ما دري والله ... العائلية باخليها لي ... لكن الشبابة باشوف لها حد من
الأهل باعطيه إياها ... باشوف حد يكون يعز علي وباعطيه ... لا لا مب مشغول ... بس
عندي جماعة من الأهل يعزون علي ...

ناصر

(يبدوا سعيدا يعود إلى كرسيه)

سلطان

(مازال مكانه يواصل حديثه) يا ريال قتله وبين لفلوس قال ما عندي يود هاك خذ هاللنج
بدال فلوسك

(ينتبه الأب للحوار فقد شدته كلمة اللنج)

سلطان

لنج عوده شكبرها .. هاذي تبي واحد راعي بحر

(هنا ينهض الأب ويتجه ناحية السلم وكأنه يتمشى حتى لا يشعر به أحد ولا يشعرهم بمتابعته
لما يسمع)

سلطان كبيرة كان يسافر فيها الهند إهو ... يقول لي طلعلنا فيا البحر نرد السوق نبيع في اليوم
بعشرة وبعشرين ألف ... بعد شأ سوي أكيه في الفرظة واقفة بعد باشوف لها حد من الجماعة
باعطيه إياها ... عاد يقولك فيها مكينتين وحجرة ومكيفة أيه لازم باعطيها واحد راعي بحر
(تبدو عليه السعادة .. يقرر العودة إلى كرسية)

سلطان وإذا مالقيت حد أعطيه إياها ...
يلتفت الأب له بضيق الآن

سلطان باتبرع بها حق الانتفاضة ... (بضحك سلطان)
الأب (بهدوء يسأل الخال) الانتفاضة ما خلصت يابو علي أخبر أنه انتفضوا وخلصوا من زمان
...

الخال خلصوا إهمه من زمان ... خلصوا عقب سالفة شهيدا شهيدا شهيدا ... عقب ما سمعنا لهم
حسن ...

سلطان إمبلا ... الأسبوع الياي إنشاء الله الافتتاح مستشفى كبير ... إيه ... لا لا ... بس
متخصصين في العيون ...

(ينهض الخال ويتجه ناحية السلم ليتابع الآن هو الحوار)
سلطان مسمينه مستشفى العميان ...
(الخال تبدوا عليه السعادة)

سلطان إيه صح بفلوس العلاج فيه لكن إحنا مسويين فيه نظام ... يديد .. إحنا كل عشرة عميان
نعالجهم بفلوس نعالج عمي واحد إيلاش ... مسمينها صدقة المستشفى ...
(الخال لا يفهم ما هو مقصد)

سلطان يعني إنت ألحين ما تروح تشتري نعال ساعات يعطونك معاها وحده إيلاش
الخال يهز رأسه

سلطان إحنا جذيه ... كل عشرة عميان واحد بلاش ... هدية من المستشفى إيه عاد أمس عالجوا
العشرة عميان .. متصلين فيني عشان أدور لهم العمي بو بلاش علشان يعالجونه ... باشوف
عاد أنه عمي مسكين ومحتاج .. وبنخليه يفتح إيلاش
(الخال ... سعيد جدا بما يسمع)

وعمليه ممتازة تفتح على طول وانت طالع من غرفة العمليات
(الخال يذهب إلى كرسيه ويسأل الأب)

سلطان

ما يندري عاد بنج كامل ...؟! وإلا بس الراس؟؟! بينجونه ...

الخال

لا لا ... بنج بس صوب العين ... زين خلني باشوف أنه إذا ما حصلت عمي من الجماعة
باقولك .. لأن المستشفى متصلين لي قالو لي لازم بعد ساعة اتصيد لنا عمي .. نعالجه ..
يعني تيبب لنا عمي قصدهم

سلطان

(لهم) يا جماعة الوقت يمر ... ورائه أشغال ... طولنا أشوف

الخال

زين ... زين ولا يهكم خلاص مع السلامة .. تقول مستعيل

سلطان

(معتقدا أنه يكلمه) أي والله

الخال

ما يحاجيك إنت ... في التلفون يسولف ...

ناصر

(يغلق سلطان التلفون الوهمي ... وينزل تجاههم وهم في صمت)

(سعيد جدا بما فعل) السلام عليكم ...

سلطان

(يجلس يرفع يده في خجل ليرد ... وهو يخفي يده عنهم معتقدا أنهم لا يشاهدانه ... وبعد
صمت)

ساكتين الجماعة ... (للخال) بو علي شلونك ...

سلطان

(الخال لا يرد فقط يشير إلى عينه وأنه أعمي ويريد أن يفتح)

صبح الأسبوع اللي راح داش حوش ناس في فريجكم عقب المغرب وقعدت في
الحوش ... والحريم مساكين خافوا وصكوا عليهم الحجر ... وتموا خسايفين ينطرونك
شبتسوي عقب شوي وإلا واقف في الحوش تصارخ ... يله أقم الصلاة عطلتنا (يضحك
الخال ثم يشير ويؤكد على أن العمى هو السبب ... وأتمنى لو فتحت !)

سلطان

حيا الله من يه ... أمروا ... فيه شيء تبون تقولونه موضوع تبون تفتحونه ... حد تبون
إطقونه ... (لا أحد يرد ثم بعد صمت) هاذي الدنيا ... (صمت) ماتم على حال ...
واللسان ما فيه عظم (لا أحد يرد) عاد ما يصير يا جماعة .. قولوا أي شيء أسمع
صوتكم

سلطان

ما دري والله إذ الجماعة عندهم شيء ... يقولون ...

الخال

ناصر عندك شيء نبي تقوله

الأب

(بعفوية جدا) إيه عندي

ناصر

(في نفس اللحظة ينهض الأب والخال تجاه ناصر ليمسكان به خوفا من نهوره)

الخال

يود ولدك يوده

الأب

ميوده أنه

الخال

شها الكلام يا ناصر ... جدامك خالك وابوك قالوا ما عندنا شيء نقوله ... إنته تقول عندي ... شعندك إنت وإلا إحنا شعندنا ... سالفه يعني من ناحية إن إحنا عندنا سالفه إحنا ما عندنا سالفه ... ناس طيبه يايه إتفهوى عند ربال طيب والنعم والله ...

الأب

ناصر

(مندهشا منهما) شفيكم بيه ... خالي ... أنه قلت إيه عندي ... إنتو عرفتوا شعندي

الخال

(غاضبا عليه إيه إيه شعندك أجوف شعندك ؟ !

ناصر

عندي قصيدة أبي أقولها حق عمي سلطان ...

الخال

مدح ... مدح ... ناصر في المدح يقول ... سامع قبل من شعره ومايقول إلا حق الناس اللي تستاهل

الأب

(فرحا) سمعنا يا بوك

(نسمع صوت تالم نورا من الداخل)

صوت نورا

آه ... آه ... آه ...

الخال

بالسلامة إنشاء الله بالسلامة ...

سلطان

(يقصد يطرح الموضوع) تبي تروح تولد في المستشفى وانه يايب لها وحده متخصصة في شؤون الولادة .. لي البيت ... لي مكانها

الخال

الله يقومها بالسلامة ... شفيها الولادة في البيت .. أنه مولود في البيت ... ووحده مب متخصصة وهي إطلعني دخلت أصابعها في عيوني بس هذا عيبها ولا هي ممتازة

الأب

بنات هليام بعد طال عمرك تدري كل وحده تشوف الثانية ... وإلا أهنا لول عاشوا يولدون في البيت واحنا اللي نشقى ونتعب ... الواحد يدش البحر بطراد صغير بونفر ... صغير ... وعتيج ... ومزق . ماظن بعد يستمر شهر معاي .. أمس منبط .. مب عارف شاسوي بدون شي يدشني البحر ... لازم أبي لي شيء إذا طاح .. وين أحصل هالشيء

الخال

أنه عمي يا ريت أفتح جان صلحت طرادك ... خاطري أفتح بعد (بما معناه ألا تفهم ؟!) .. خربان قلنا لك .. خربان كلش ما ينفع ...

ناصر

هه أنه لو عندي سيارة .. جان خالي لين فتحت إنت أنه أوصلك تصلح طراد أبوي .. لكن ما عندي سيارة

الخال

الخير ياي ... وأهل الخير ما يقصرون .. سمعنا بس إنته قصيدتكم اللي تبي تقولها حو
عمك سلطان بن شاهين الغيمة

الأب

والنعم والله ...

سلطان

ما شا الله شاعر يعني كل وقت تكتب

الأب

(مدافعا عن ابنه بحرارة وصدق) لا لا لا ... ما يكتب أي وقت ما يكتب إلا وقت الحاجة

...

سلطان

إش حاجته ؟ !!!

الخال

أو هو قام يخوره ويرشه هاذيه بعد ... هو يا بو شاهين يقصد وقت الحاجة ... للشعر ...
لي طلب الشعر واحتاج قاله تعال ... سمعنا ... سمعنا مدح مدح مدح ...

(الأم ونورا تتخلان دون أن يشعروا بوجودهم نرى الأم تحمل حقيبة للمستشفى وتتفاجئسان
بالمنظر)

ناصر

(لا يراهما) بو شاهين راعي الكرم والجود .. كل محتاج في بحرهِ سبيح

الأب

(يقف بانفعال ليكمل) وسماج بعد طراد لنج عنده ...

(ناصر وقد شاهد أمه ونورا يحاول إيقاف الأب الذي يواصل بحماس دون اكتراث)

الأب

أن بغى الصيد قرقور ولا على كيفه لفح

(ينتبه الأب الآن للإشارة فيشعر بالإحراج ... في نفس اللحظة يقف الخال منفعلا هو الآخر
.. فيحاول الأب إسكاته دون فائدة)

الخال

(بحماس كبير) أصل الأصل إنته .. أب وجدود باسبابك إنته كم عمي فتح ...

سلطان

(قاصدا في وجود الأم ونورا فيجلس جلسة العظماء) يقول بوخلف الصمي لما كان الوالي
يسمع الشعراء ويعجبه الشعر يقول لهم عيدوا (يمثل دور الوالي) وأنه أشهد بالله إن شعرك
عجبني يابن الأعمى عيد ما قلت ...

(الأب ما زال يحاول منع الخال من المواصلَة)

الخال

(غاضبا) بيخلينا نعيد هاذيه ... ما جوفه يا حضرة الوالي (يستدرك) يا بو سلطان ... بس
إنْت ما قلت ما تبي غيرك يقول ... هذا عيبنا الحسد ... بروحك بس تبي تاخذ اللي تبيه ...
خل غيرك يترزق ...

ناصر

(للخال بخجل شديد) خالي ... تراه أمي واختي هنيه واقفين ...

الأم

خله ... سمعتكم ... خلني أسمعهُ هو بعد ... صح لسانكم ... والله والنعم كلكم قول وفعل

سلطان

أما والنعم ... والنعم الصراحة ... رجال ... يابيين يسلمون ويقصدون ... ماشفت منهم إلا

كل خير ... وما راح يشوفون مني إلا كل خير ... كل خير إنشاء الله ...

وين حجيكم مساعه .. أيه على حظي ... سوالكم سحر ... سحر كم

لفلوس وما تسوي يا يمه

ناس أتعرف مصلحتها ... إنتي بس اللي مب عارفة مصلحتج...

(يحاول التهرب) تونا قاعدين مع الريال ... ما سولفنا داشين علينا طناسة ...

زعلت أنه ... يا بو ناصر ... بس بس بامشي ... الباب وين ... الباب وين .. بو

شاهين بنبيك المكتب نكمل سالفتنا

زين جذبه زعلتوه .. عمي ألحين يروح بروحه ويضيع ... أمش ناصر ... خلنا نوصله ...

بسرعة . خلاص بو شاهين في المكتب بنتفاهم

مشكور يا يبه ... مشكور يا ناصر ... هاذي وقفنكم معاي

أمش بسرعة عاد ...

(يخرجون جميعهم)

رجعيها داخل ورجعي شنطتها ... وما بي أسمع كلمه يله

(وهي ممسكة بنورا متجهة للداخل) هاذي آخر الزمان يا بنتي ... كلمة الحق ضايعة ...

والذمة مشريه ...

(مع خروجهم يرن تلفون سلطان ... فيفتحه ويتحدث)

ألو .. هلا بو سالم ... (بدهشة كبيرة) شلون ... وين هاذيه ... في أمريكا؟! شللي حرقها

... لاحول .. هاذي مشكلة يسوون عمارات رفيعة في طريق الطيارات .. ودعمتها .. ألحين

في التلفزيون ... لا تقول ... (يتجه ناحية التلفزيون ليفتحه) الجزيرة شيطانه هاذي أم

الإتجاه المعاكس ... (يشاهد الآن ما يحدث ونسمع صوت مذبة الجزيرة تعلق على أحداث

سبتمبر على الهواء مباشرة) يه .. أكيه الضو شابه .. زين بو سالم شلون هالطيارة إدعمت

هالبرج ... الطيار عمي ... مخطوفة (يتابع الآن تفجير البرج الثاني بنفسه) يه ... يه ... يه

أكيه بعد طيارة ثانية دشت في البرج الثاني اللي حذاه ... هاذيه صج الحين وإل فلم .. هاذي

مقصوده أشكرة ... أمريكا مبهذه العالم خله تذوق شوي الويل اللي تذوقه الدنيا ... (هنا

نسمع رنة جهاز التوك باك)

لحظة بو سالم (ثم للجهاز) من ؟

(بحماس يتحدث) أيوه يا عم سلطان إفتح بسرعة عايزك ضروري ... بسرعة ... بسرعة

...

الأم

نورا

سلطان

الخال

الأب

نورا

الأب

سلطان

الأم

سلطان

سلطان

صوت راضي

سلطان

(يضغط على الزر) بل ... بل شعندك تصارخ .. كله طابير وكله مستعيل ويس دش دش ... يله ... (يترك الجهاز ويواصل الحديث مع بو سالم في التلفون)

سلطان

(ينتبه للتلفزيون مندهشا) إتشوف يا بو سالم ... هاذيه بعد شنهو ذيه المبني اللي ضاربينه ويحترق ... هاذيه غير البيبين اللي كانوا واقفين ... به تعال ما جوفهم وين راحوا ... طاحوا ... لاحول ... وهذا المبني شنهو ... بيت من ؟ بيت ناغون منهو ذيه ناغون ... أكيد واحد من الكبار عندهم .. بنتاغون .. يعني شنهو .. أوه الدفاع للا هاذي عودة ... تبي قعدة ... إيه تابع ... إيه كبرت السالفة ... مع السلامة (يغلق التلفون)

راضي خلف الباب الزجاجي (يجري سلطان ليفتح الباب وهو مندهش مما يحدث وبداخله نوع من الفرحة لما يدور ... يدخل راضي لكن يبادره سلطان على الفور)

شفت شصار في أمريكا ؟

سلطان

(بإحساس الكارثة) آمال أنا جاييلك إيه ؟

راضي

تستاهل أمريكا ... خبز خبزتيه كليه !!

سلطان

وفرحان ؟!

راضي

ما فرح عيل ... والله رجال ذيله اللي سوووها ... قلوب حديد

سلطان

(يحاول أن يوصل له الأمر) إنته عارف البرجين الكبار دول اللي وقعوا بتوع إيه ؟ !

راضي

شدراني بتوع إيه ... هاذيلة أكيد ملك حد من كبارية أمريكا ... شوف عاد من ملكه يا ملك بوش يا ملك حد من عياله ... يا حق زوجته

سلطان

بوش مين و عياله مين البرجين دول همه مركز التجارة في أمريكا ... والبورصة العالمية بتاعة نيويورك دي البورصة انهارت والشركات بتلطم ... دي كارثة

راضي

(مندهش) بورصة

سلطان

فاهم يعني إيه بورصة ... وانه عمال ترقص فرحان ... يعني الفلوس راحت يا صابر !

راضي

(مصعوقا وبذهول) ها يعني هاذيله ألحين إضربوا البورصة

سلطان

دول دمروها

راضي

مجرمين ذيله حاقدين على أمريكا مسكينة ما تستاهل البورصة راحت؟

سلطان

ده أبو منصور خدوه على الطوارئ من أول برج ألتلك ما تستعجلش ... راحت محول كل فلوسك للبورصة ... دي مصيبة وحلت بينا ...

راضي

(بهستريا) يعني حلالي ضاع ملايني راحت (كالمجنون) يعني أنه فلست يا راضي

سلطان

فلست آه ... آه ...

راضي

(يجري للمسك به كي لا يقع) يا عم سلطان عم سلطان

(يحاول أن يجلسه ... وهو منهار تماماً بينما هو يحاول أن ينادي على أحد في المنزل)

راضي

يا جماعة ياللي في البيت هنا أي جد يجي يساعدني بس ... عم سلطان ... عم سلطان ...
(نسمع صوت صرخة نورا من الداخل)

صوت نورا

آه آه ...

(ثم نسمع صوت بكاء طفل يولد الآن ! " وخلفه نسمع زغاريد الأم)

راضي

ودا وقته .. يا جماعة أنا مش عارف أعمل أيه يا جماعة... يا جماعة

نهاية الفصل الأول

الفصل الثاني

المشهد الأول

الزمان	بعد مرور شهر من حادث الانهيار
المنظر	نفس ديكور الفصل الأول من حيث الشكل لكن المختلف الآن هو أنه اصطبغ بالذوق النسائي من حيث اللون والمناظر الناعمة ... ورود ...بدل الحيوانات المفترسة المحنطة وبحيث يبدو للرائي وكأنه منظر جديد مع إن البناء لم يتغير !! (تدخل الأم ويبدو عليها الاستعجال)
الأم	نورا .. نورا .. يله يا نورا
صوت نورا	أنه كلمت الضابط قال قاعدين لين الظهر .. عندنا وقت لا تخافين
الأم	أنه مب خايفه من الوقت ... خايفه من اللي هادين عليج أكمه يابيين
صوت نورا	منهم
الأم	خالج وإبوج وإخوج
صوت نورا	(معاتبه) أنه قايلتلج يمه ما بي حد منهم يدري بأي شئ
الأم	وأنه شيخصني .. والله إني مايبيت لهم طاري ... إبوج كلما سألني شسوت نورا ويا ريلها ... أقوله ما أدري ... حياتها وكيفها
صوت نورا	عيل من وصل لهم الخبر ؟
الأم	شدراني ... إبوج يقول ... إنه شرطي رفيج إخوج قايله إنج متكفله

تسددين ديونه وتطلعينه من السجن

صوت نورا لهم ويه بعد يتدخلون في حياتي... مالهم خص أصلا

(نسمع صوتهم من الخارج)

صوت الأب يود خالك انت بس لا تهده

صوت منبطه جبدي أنه

الخال

صوت خله يطقها ... أنه مستعد آرضمها معاه..

ناصر

الأم هذمه وصلوا ...

(يدخل الأب وخلفه الخال وناصر ممسكا به)

الخال (كعادته هائجا وغاضبا يتحدث كأنها موجوده) ما تستحين إنتي ما

تستحين وين كرامتج ... طول عمره ذالج ومذوقج الويل آخرتها تبين

طلعينه من السجن ... آه يا لقهر .. ناصر .. أي صوب قاعدة خلني

أعطيها طراق .. تف على هالويه

الأم أخوي تعوذ من إبليس .. من تحاجي إنته محد هيه إهنيه .. ومنهي

اللي بتعطيها طراق .. وشحقه .. شعندكم يابيين هاديين على البنيه ..

مالك حق .. هاذي حياتها وهي حره فيها لا حد ناداكم ولا حد طلبكم

.. حشرين أعماركم شحقه

الأب ما تعرف مصلحتها

الخال إطلعه من السجن وتكفله شحقه .. تخليه يولي .. في ستين داهيه

الأب شحصلت منه غير المذله والعذاب

- الخال هو كان ساجنها قبل
- الأب ألحين هي تطلعه من السجن .. يعني هي إشتغلت وخسدت معاش
 علشان تسدد ديونه .. ما يستاهل
- الخال وجذاب .. جذاب .. إحنا ما نرضه نذل عمرها لي هالدرجه وتروحله
- ناصر من زمان أقولكم .. أبي سياره .. أبي سياره .. ألحين لو عندي
 سياره .. جان انحلت المشكله
- الخال سكنت إنت بعد .. سياره وسياره
- ناصر (منفرزا) ما بيها لي أنه ... أنه لو عندي سيارة ألحين جان على
 الأقل أدمم التكسي اللي بيوصلها مركز الشرطة وأعطيها ما تروحله
 .. هذا يزاي بعد أسوي فيكم خير بدال ما الناس يتحجون علينا ..
 يقولون مبهدل بنتهم وآخرتها إطلعه من السجن ما عندهم كرامه ذيله
- الأب يعني إنتي تشوفينها عدله .. عقب اللي سواه فيها تروح تكفله
- الخال هي وين هي .. ليكون بس هي راحتله .. واحنا بس يابين نزعق في
 الوقت الضايع .. تحجي انتي بنتج راحت ولا ما راحت
- الأم عاد راحت والا ما راحت اليوم هي مره وام عيال وتعرف مصلحتها
 وين
- الخال (ثائرا عليها) من إمتة تعرف مصلحتها هي .. ناصر يودني لأغلط
 ألحين .. صغيرة هذي توها لا يغرج يابت ياهل .. تقولسي تعرف
 مصلحتها .. من إمتة تعرف مصلحتها
- (في هذه اللحظة نورا قادمة بانفعال .. وهي ترتدي ملابس^٢ عصريه
 محتشمه وبكامل زينتها)

نورا

(بانفعال) .. من اليوم اللي ترجبتكم فيه تتقذوني من ظلم سلطان وجبروت سلطان .. من اليوم اللي ترجبتكم تيون توقفون معاي وتسحبوني من تحت ربولة وهو يدوسني .. وتوقفوني على ربولي من اليوم اللي ترجبتكم توقفون في وبهه وتقولون له كلمه بس تخليه على الأقل يحترمني كإنسانه وييتو .. وليتكم ما ييتو .. أمام مصالحكم بعنوني برخيص بعنوني بجذبه جذبها عليكم .. اللي بلعني بسياره واللي باعني بلنج من ذاك اليوم يا خالي عرفت مصلحتي عدل

(حالة صمت على الجميع .. تستمر للحظة وسط الإرتباك والإحراج)

الأم

بس قوموا روحوا بعد شمععدكم !!!

ناصر

(يحاول التبرير) أنه أصلا كنت ناوي أخذ السيارة منه .. وأروح أسجلها في المرور .. بعدين أوقفها عند البيت لين أدبر فلوس البترول .. بعدين أدعمه فيها .. خطه يعني كنت مسسوي .. أنه شدراني إنه هو جذاب

الأب

نعم ... إحنا كنا نجاريه .. ناخذ من عنده اللي بيعطينا .. لكن مب معناها نخليه يبهدلج ... لاء

الخال

اللي راح راح إحنا نتكلم عن اليوم

نورا

اليوم .. مب محتاجه حد .. لأن الكلمه كلمتي .. وأنه اللي أتصرف في البيت .. وأعيش الحياه اللي أبيها .. تظمنوا بالله نروح يمه لا نتأخر

الأب هادي طرده هادي .. لكن هذا انتي سمعتي بنتج جدامج .. مب بلجر
تقول تعالوا ساعدوني .. إحنا مالنا خص .. قوموا نمشي .. ناصر
خذ خالك

(ناصر يمسك الخال متجهن لباب الخروج .. وبمجرد وصولهم
للباب .. يلتفت الخال وهو يكاد يبكي قهرا)

الخال (كالطفل يبكي حين يمنع من الانتقام) لازم ما يطلع من السجن .. ما
يطلع .. يرضيخ يعني يقص علي .. يقولي بخليك تفتح .. شهرين
من الفرحه ما رقدني في الليل .. أتحم .. كل شغلي أجليته معلملاتي
وقفت في كل مكان .. يتصلون فيني .. مته بتي أقولهم عقب مافتح
.. مشكوره نورا مشكوره

ناصر خلاص خالي خلاص .. أنه آالحين لو عندي سياره .. جان خليتك
تفتح

الخال (يلتفت له بإندهاش) بتدعم خالك بعد

ناصر آفا عليك خالي .. لو عندي سياره جان بعثها وبفلوسها أخليك تسوي
عملية تفتح

الأب أمشوا .. أمشوا بس أمشوا .. بوزنه يتمنى الجنه

(يخرجون)

نورا شفتي يمه حتى بيتهم هذي مصلحه .. مب يايين علشانني يايين ييون
ريبردون حرتهم في سلطان وينتقمون منه .. بعد مصلحه

الأم يا بنيتي ألحين يوم إنج بتكلفين تسددين ديونه وتطلعينه حاسه إنج
بتعيشين معاه مرتاحه .. بيقدرج .. وبيعاملج مثل ما يعامل الزوج

زوجته

نورا

(بسعاده وثقه) يمه هو مب لولي .. عقب اللي صار له .. حس
وعرف وشاف محد وقف معاه إلا المره .. اللي كان يهينها ولا
يعتبرها شئ .. إنتي مب مصدقه .. ما تقولين سلطان ذام لولي ..
أفكاره تغيرت كلامه تغير

الأم

إنشاء الله .. صبرتي بعد والله عطاج

نورا

يوم درى إنني اشتغلت ما نطق ولا قال شئ .. اللي لول ما يرضى
حتى أوصل الباب .. لا بعد وقام يقول كلام غزل .. بس غزل على
قده

الأم

(باستغراب) سلطان؟!

نورا

(ضاحكه) يقول زواجنا لول كان مؤسسة أملكها أنه بروحي لكن
من اليوم يا نورا زواجنا يتحول إلى شركة بين إثنين

الأم

أخاف بس حجي .. أنه قلبي قارصني منه

نورا

الإنسان لما تصيده صدمه كبيره حياته إتغير .. واللي صار له هو
مب سهل .. وين كان وشصار ألحين .. لازم يتعلم وبروحه مسكين
قالي هذي درس يا نورا الله علمني إياه عشان أحطج في عيوني .

الأم

إنشاء الله إنتي نيتج زينه .. تبين تحافظين على بيتج .. عسا بس
جهزتي الجيكات اللي طالبينها منج

نورا

كلشي جاهز

(يرن التلفون)

نورا

ألو

صوت وينج الجماعه في المركز ينطرونج .. ترى همه القضايا فرزوها لـج
سلطان كلها .. ثلاث وعشرين قضيه الموجوده في المركز حاليا .. وست
قضايا لين أحين جاري العمل بها .. غير الثمان ذيلك الموقوفه ما
عندهم أدله بس يتبلون على خلق الله .. والقضايا التسع اللي كلمسج
عنهم الضابط توهم مسوين لهم ملفات .. بيجوفون الوضع يعني
بعدين

نورا وفلوس هذا شسمه .. اللي كان في المركز من جم يوم .. رفيجك
صوت لا لا .. قضايا الأفراد هاذي تحقيق ثاني لها .. فيه محكمه مختصه
سلطان ما عليج إنتي إهمه موزعين الشغل بينهم .. المهم بتكون اللسته عندج
واضحه .. أنه ليش قبل ما عرفت قيمتج .. بعد خلف الصمي
ماسوى فيني خير .. زين عاد يله تعالى بسرعه .. ترى زهقت من
السجن .. لازم اليوم أطلع أبي أتسبح

نورا أنه ألحين يايه على طول
صوت صبر يا رفيق ما فيه خلاص أنا تلفون .. بعيد .. بعيد أربط وزارك
سلطان .. بعيد فطستنا .. بسرعه يا نورا .. بسرعه وسلمي على الغاليه أمج
.. وعلى كل من يعز عليج .. حاولي ألحين على طول إتطلعين
وتيين .. وخلي عنج التكاسي مالت الشوارع اللي يسوقونها ربايل ..
إطلبلي تكسي بالتلفون وقوليلهم أبي مره تسوق وتعالى معاها .. تعالى
مع مره .. مره

نورا إشمعنى يعني مره تسوق .. المهم تكسي يوصلني
صوت أغار .. أغار عليج بالغاليه .. يله أنطرج بسرعه مع السلامه

سلطان

(صوت إغلاق التلفون تنزل الشغاله بيدها المراضيع)

نورا

رقد خالد

الشغاله

ايه ماما سوا سليب خلاص

نورا

زين غسلي مراضيعه وردي قعدي عنده فوق لين أرجع .. الطباخ
خليه بعدين .. والله يمه مسكين صار يكسر خاطري .. وايد أحسن .

الشغاله

زين ماما

(نتجه للمطبخ)

الأم

ما دري شلون أنه من ناحيته لين أحين قلبي فيه قرصه

نورا

عاد بعد مهما يكون يمه .. الإنسان يتغير .. لكن بعد تبقى أشياء من
الماضي فيه .. ما تروح مره وحده تاخذ وقت .. بسيطه هاذي أهم
شيء يايمة إني أنه أحين أحس إني موجوده ولي شخصيتي ولي
إعتباري .. والأهم أحس إني ملكه في بيتي

إظلام

المشهد الثاني

- الزمان بعد مرور أسابيع من خروجه
- المكان نفس المنظر في الفصل الثاني مع سرير طفل في الصالة تفتح الإضاءة على صوت التلفون يرن في الصالة الخالية .. وصوت نورا قادم من أعلى
- صوت نورا (بصوت أمر) وينك حبيبي .. رد على التلفون .. إنت وين .. بو خالد التلفون .
- صوت (من جهة المطبخ) في الحمام .. أنه في الحمام .. أنظف خلود .. سلطان مسويها
- صوت نورا بسرعه التلفون يرن .. شوفه يله
- (يخرج سلطان قادما بسرعه من المطبخ وهو يعلق على رقبته حمالة الأطفال .. ويحمل خالد الطفل بيد وبالأخرى (حفاظه) .. يرمي بخالد والحفاظه في السرير بشكل عشوائي ويتجه ناحية التلفون)
- سلطان ألو .. إينعم .. بيت نورا القوع .. أنه المدام .. أنه الريل .. ريل زوجها .. زوجها .. سلطان بن شاهين بن كليب بن مسعود .. مسعود آل غيمه .. إحنا اللي قال فينا الشاعر
- صوت نورا إنت قاعد تقولهم بطاقتك الشخصيه .. شوف شا السالفه
- سلطان حاضر حاضر .. من يايها .. السكرتير .. ريال إهو .. لا مب قصدي .. والنعم فيه .. بس تعودنا السكرتير تكون مره يعني ..

إنشاء الله بأقولها .. يايتها البيت الريال .. يبغيها .. زين
(يغلق السماعه)

صوت نورا من ؟

سلطان (يكلمها وهي فوق) ها ذيه تلفون من نادي فتاة الوطن مالكم وحده
تقول .. (مقهورا من الداخل) ريال يايج البيت

صوت نورا (باستكار) من ؟

سلطان السكرتير السكرتير ألحين ببيج

صوت نورا (برضا) أوكيه

سلطان (مقهورا) والله !؟

(صوت الرضيع خالد يبكي)

صوت نورا سوله رضعه يا بوخالد ما تقصر أنه قاعدة أسوي شعري رايحه
النادي اليوم عندنا الانتخابات

(سلطان ينشغل مع خالد ويحمله ليقوم بالعناية به ويلبسه الحفاظه ..

أثناء ذلك يرن جرس التوك بالك في الصاله فيتجه ناحيته)

سلطان من ؟

صوت افتح يا سلطان أنا راضي

راضي

سلطان (بسعادة) تفضل تفضل ...

(هو يقوم بخلع الحمالات من رقبته ويسرعه يقوم بوضع الحفاظه

على خالد .. وعمل رضعه له ووضعها في السرير .. هنا نشاهد

راضي يقف خلف باب الصاله .. فيراه سلطان ويفتح له الباب ..

- يدخل راضي حاملا بيده ملف كبير)
- سلطان أهلا حيا لله راضي
- راضي إزيك يا سلطان دلوت
- سلطان الحمد لله .. والله والنعم .. إنته الوحيد اللي تزورني عقب أحداث
- إحدى عشر سبتمبر
- صوت نورا وصل ؟!
- سلطان لا لا .. هذا راضي .. رفيجي اللي كان يشتغل عندي لول ..
- تخبرينه
- (نورا قادمة من السلم وهي تضحك)
- نورا (تنزل إلى أول السلم وتقف) هات الأوراق .. شعندك ؟!
- (يتجه راضي وسط ذهول سلطان)
- نورا شغلته أنه سكرتير عندي في النادي .. الشغل وتأسيس النادي وزحمة
- الانتخابات نستني أقولك يا بو خالد .
- راضي (مندهشا) الله هو مايعرفش .. أنا كنت فاك
- نورا (مقاطعه) عادي يا راضي أنه وسلطان واحد خلاص ألحين عطني
- الملف .
- سلطان (ساخرا) مايعرفش ... مايعرفش (متألما)
- نورا شتقول !!
- سلطان لا لا ماقول شئ .. خير ما فعلتي .. راضي طيب .. يستاهل ..)
- بنفس القهر الداخلي (وما شاء الله من زمان يعني معاج
- راضي دنا مع المدام كملت شهر ودخلنا على الثاني

سلطان وإنشاء الله مرتاح

راضي آخر راحه .. المدام مريحه الجميع بصراحه يعني .. كل اللي في
المكتب مبسوطين معاها

سلطان مايعرفش ... ما يعرفش

نورا شتقول انت ؟!

سلطان لا لا .. حبيهم حلو

(هنا يبكي الطفل خالد)

نورا تملل وعليه من السرير .. شيله شويه خله يسكت

(سلطان يحمل خالد على كتفه ... راضي ينظر بذهول لهذا الموقف)

(

نورا (بسعاده) شفيك راضي مستغرب هذي الدنيا والانسان الشاطر هو
اللي يتعلم وبو خالد مثل ما تشوف الحمد لله تعلم ان البيت السعيد هو
البيت اللي يقوم على الشراكه بين الاثنين .

راضي ربنا يديم الموده ويخليكم لبعض

سلطان يا راضي المرأة نصف المجتمع .. وفيه ناس تقول لا المرأة كل
المجتمع .

راضي والله

سلطان طبعا وهذي عليها صفة .

نورا (لراضي) سمعت يا راضي

راضي أنا سمعتك بتتولي إنه سلطان تغير كثير .. بس أول مره أشوفه بعنيه
.. أنا مش مصدق إيه اللي باشوفه .. إيه الرقي ده .. إيه التعاون

الجميل اللي بيحصل بينكم في البيت . قمة التقدم .. اللي بيحصل ده
شغل أجنب .. ناس واعيه الأم بتشتغل .. والأب في الحمام بيعمل
للحيل بيه بيه .. حاجه كبيره .. هيه دي العولمه .. ايه ده يا سلطان
بيه ..

سلطان (يرد بكلام محفوظ) .. إن الأسرة هي النواة التي يتكون منها
المجتمع ولكي ينهض المجتمع .. لا بد أن يقوم على مبدأ التعاون
والذي تغرس ثمرته الأولى في البيت

راضي ما تقوليش أبو خلف الصمي بتاعك اللي قايل الكلام الجميل ده ؟!

سلطان منتهى الرمحي .. للنساء فقط

راضي ربنا يديم التعاون

(هنا يبكي الطفل خالد مره أخرى بشكل أطول من السابق)

نورا (له مقتربه وتحدثه بينها وبينه فقط) الظاهر مضايق من الحفاظه ..

مسوي شئ .. وده غسله علشان ما يزيد عليه الالتهاب بس .. بس ..

حبيبي

سلطان (هامسا بقصد آخر في نفسه) يعني تبيني أروح أنه ألحين

نورا (بعفويه) سلطان شبلاك .. أقولك وده نظفه نقولي أروح شفيك إنت

.. بتتظف خلود في الصاله .. فيه حمام هنيه

سلطان لاء .. أنه عشان راضي هنيه

نورا ما عليك من راضي .. راضي ياي لي أنه

سلطان (مقهورا) آه أدري إنه ياي لـج (يخرج للمطبخ) مايعرفش

مايعرفش

(تظل هي وراضي الآن)

نورا مستعدين حق الانتخابات اليوم ؟

راضي كل حاجه جاهزه .. منا عشان كده جاي لسعادتك توقعي في السورق ده

نورا (وهي توقع) الصاله جاهزه .. الكراسي

راضي كل حاجه .. لجنة الإعداد اللي بترأسها الأخت ساره بسم الله .. مسا شاء الله قايمين بواجبهم على أكمل وجه

نورا والأكل والمرطبات حق الضيوف

راضي الحمد لله وافق المطعم يتبرع لنا .. المدير بيقولي إنتو نادي تطوعي لخدمة المجتمع لازم إحنا نخدمكم كمان .. راجل طيب بصراحه

نورا (تسأله) هاذي شنهى ؟

(يقترب منها لينظر في الملف)

راضي فين

(هنا يدخل سلطان بالطفل ويصدر صوت كمن يدخل مكان غريب)

سلطان إنشاء الله بس ماخربت عليكم

نورا (متضايقه) سلطان شفيك إنت .. شتقول !؟

سلطان (وقد خاف أن يتطور الأمر) أتغشمر .. ما تبون الواحد يتغشمر معاكم

نورا باقي شئ عندك راضي

راضي آه الأخت ساره وصيتي آخذ منك العود والبخور آلت عشان الضيوف .. أصله جايين الصحفيين والإذاعة والتلفزيون جايين كمان يغطوا ..

أول انتخابات للنادي

- نورا قولها إهيه في البيت قاعده تنظر أمها تبيها وبتروح معاها .. بتيب
العود والبخور .. أمي تعرف هالسوالف أحسن مني
- راضي ماشي .. تأمري بحاجه .. آه أنا نسيت أقولك إتصلوا النهارده وكالة
السيارات قالولي السيارة وصلت يا بكره يا بعده قالو هاجبوهالك
لغاية البيت مبروك يا أم خالد .
- نورا الله يبارك فيك .. مشكور
- راضي يله مع السلامه .. مع السلامه يا عم سلطان
(سلطان لا يرد)
- راضي فيه إيه يا عم سلطان
- سلطان لا لا لا لا
- راضي ماشي .. كده ماينفعش أنا مشغول دلوقت .. لكن لي قعده معاك
مخصوص
- (يخرج راضي)
- نورا أنه ترى بطلع ويا أمي وباروح النادي وعقب رايحه الدوام .. باتأخر
اليوم .. تغده إنته وخلي أنه
- سلطان حاضر إنشاء الله
- نورا أبي صالونه عاد اليوم
- سلطان آفا عليج .. أمس قلتيلي خاطرنا في صالونه .. آفا عليج أكو الجدر
على الضو .. اليوم بعد مسويه لك صالونه .. مسوي ليج صالونه
عجيبه

(تدخل الأم)

الأم

السلام عليكم

نورا

عليكم السلام .. هلا يمه .. سلطان صبب إنته قهوه حق أمي فطام

بس ما جهز نفسي (تذهب نورا للأعلى)

سلطان

(للأم) اللي تامر عمتي .. القهوه موجوده والعصير موجود

(بيكي خالد فيحمله ويعلقه في رقبته بالحماله والأم تنتظر له مندهشه

ومنبهره بالموقف والتحول)

سلطان

شفيج عمتي تطالعيني

الأم

إنته سلطان أنه مب صدقه

سلطان

النظام العالمي الجديد .. آمري قهوه

الأم

صبح دنيا .. يله أشوف روح هاتلي تميره حطها في صحن ..

وأغسله عدل عاد

سلطان

حاضر .. حاضر ماما .. تمر واجد هلو فيه .. هيه هيه هيه

الأم

(تخاطبه جهة المطبخ) الله ما يطق بعضا .. رضخبك من فوق لي

تحت .. ما قاذك لا الصمي ولا غيره .. ما قاذتك إلا هالمسكينه اللي

كنت ذالها وحاطها تحت نعالك .. اللي لو مب هي جان لين أحسن

خايس في السجن ما طلعت

(يعود سلطان بيده صحن تمر)

الأم

(تواصل) وشكتر طلعت الديون اللي بتسددها لبنيه وعليه

سلطان

مادري والله اللسته عندها .. يبيلها مده .. آوه خالد رقد

(يتجه للسريير)

- الأم ما فيه بعد يزأها الله خير
- سلطان لا شذعوه .. يزأها الله خير
- الأم عساه .. بس يبين في عينك اللي سوته لك .. وتعيش معاها عدل مثل الأوام
- سلطان إن الحياه تعاون بين الرجل والمرأة .. ولا بد أن التعاون تغرس ثمرته من البيت .. والمرأة هي الأساس (نورا قادمة الآن وتسمع جملة سلطان)
- الأم (تراها قادمة) مب مصدقه أنه سلطان الصمي قام يقول درر ويقط حجي عدل
- نورا (بسعادة) لا يمه سلطان خلاص مب هو لولي عرف شنهى المرأة ودور المرأة
- الأم حبيه صار حلو .. لكن مادري ليش أنه قلبي فيه قرصه .. من صجك إنته ألحين صرت زين
- نورا إيه يمه شذعوه خلاص .. الإنسان يتعلم .. مسكين حتى الشغاله قالي فنشيتها وأنه باتولى البيت من طباخ وغيره
- الأم إهو اللي قالج فنشي الشغاله
- نورا إيه يمه
- الأم يكون بدال ما تدفعين فلوس للشغاله .. تدفعينها للمحكمه .. تخف عليه لديون
- سلطان حرام عليج عمتي .. ليش إنتي شكاكه .. أنه ألحين خلاص رجل عصري .. حرام عليج

- نورا سلطان لا تلوم أمي
- الأم إيه والله لا تلومني .. اللي يعرفك قبل أحداث إحد عشر سبتمبر ما يصدق إنه إنته .. صبح لي قالوا .. يوم هز العالم
- سلطان قولي حق نفسج .. يوم هز العالم .. ما يهزني أنه .. ركب الملا عمر بطبطه
- الأم (تشم رائحة حريق) شها الريحه هاذي .. شئ محترق عندكم
- سلطان (ينتبه) الصالونه .. الصالونه إحترقت
- (يجري مسرعا تجاه المطبخ)
- نورا يمه شحقه تفاتحينه بها المواضيع قبلج هو خلاص إنهد حيله ربح وارتاح وعرف انه بدون المرأة ما يقدر أصلا يعيش
- الأم أنه والله قلبي قارصني .. وانتي طيبه .. أنه خايفه إنه متمسكن بس خايف مثل ما طلعتيه من السجن ترجعينه مره ثانيه
- نورا لا يمه وين أول وين ألحين .. ألحين مرتاحه .. وعائشه ملكه في البيت قراري في يدي .. وما يقدر يفرض علي شئ بمزاجه .. أسوي اللي يريحني .. ولا يدري عن شئ ولا يسألني حتى .. تصدقين يمه أنه تدربت على السياقه وخذت الليسن وهو موقع على الأوراق .. قاللي شحقه قلت له وقع بس أبيها حق الشغل ولين أحين ما يدري وشريت سياره ويمكن اليوم بكره إيبيونها لي .. وعادي ما يدري
- الأم زين بيشفوف السيارة لي بابها لج بيدري
- نورا عادي .. أنه أبيها مفاجأه
- الأم (تنتظر تجاه المطبخ) أكو يه .. بعلمه عن السيارة باشوفه شبيقول

- نورا الأمور طبيعية يمه .. شفيج مب مقتنعه لين أحين
(يدخل سلطان وملابسه كلها متبهذه بالصالونه والطبيخ الآن)
- الأم سلطان
- نورا يمه بتعطلينا واحنا ورانا شغل
- الأم خليني إنتي
- سلطان شفيكم !؟
- نورا أمي ما عندها سالفه أصلا تبي تقولك إني تدريب على السياقة ... و ..
- سلطان (مصدوما ويكبت شعوره) إيه تدريبتي على السياقه
- نورا وخذت الليسن
- سلطان وخذتي الليسن
- نورا وشريت سياره
- سلطان وشريتني بعد سياره (يبكي الآن ويسخر) حطي مخفي بعد أمان ..
- أمان .. أمان
- الأم (مندهشه) شصار فيك شنهو أمان ؟ !
- سلطان المخفي .. المخفي .. بروحها بتسوق .. بتروح .. بتروح .. أمان
- أمان عن الشمس
- الأم بسم الله الرحمن الرحيم .. شستوى فيك .. لا تنبط بس .. ها نورا
- تقولين الأمور عاديه
- نورا (مندهشه) لحظه يمه .. لحظه (تقترب من سلطان) سلطان ليكون

إنت زعلت إن أنه خذت الليسن وباسوق

سلطان

من يقول ؟

الأم

حالتك تقول .. قاعد تصيح

سلطان

أصيح .. أصيح .. أنه .. أنه .. ندم .. ندمان أنه ليش ما خليتها
تسوق من زمان

الأم

منك إنته .. إنته اللي كنت قفل .. راكب راسك لو مخليها من زمان
تسوق .. جان أحين بعد إهي ما يحتاي

سلطان

(ساخرا على طريقته) إيه والله ما يحتاي .. جان أحين دريوله
عوده ... تودي البنات إدربهم .. لكن أنه ثور .. ثور (بيكي)

نورا

(متعاطفه معه بعفويتها) خلاص عاد يا بو خالد .. ما فيه داعي
اللي راح راح .. ذاك ماضي وانتهى .. خلاص عاد .. علشان
خاطري

الأم

خليه يندم على فعايله .. الندم زين حق هالأشكال .. يا مال لضعفه
حتى وانته تصيح واقف .. إقعد .. تلايم على الكرسي وصيح مثل
خلق الله

(يجلس على الكرسي وبيكي)

الأم

إمشي بس إمشي .. ضاع الوقت علينا .. ماحب أقعد وقلبي مقروص
يله .. حط بالك عاد على خويلد .. وغداه لا تتساه .. إخطئه مع
الروب

نورا

(تخرجان .. من الممكن بعد خروجهما يقلد كونه شغاله ثم ينهار
باكيا على حاله وعلى وضعه الذي وصل إليه مع بكاءه .. بيكي

الطفل خالد .. فينهض تجاهه غاضبا (

سلطان

(يتعامل معه بعنف وبشيء من القهر والتشفي) بس انت بعد .. جب
(يزيد بكاء الطفل هنا)

سلطان

(يرفعه يلوح به في الهواء كدميه !) قلنا لك بس .. بس .. شها
البلعوم اللي ما يتعب .. طالع على أمك .. (بيكي) جب .. جب
(يبدو هنا راضي خلف باب الصاله وهو يقوم بقرع الباب بيده)

سلطان

(ينتبه للباب فيذهب لفتح باب الصاله)

راضي

(يدخل) فيه إيه بئه يا عم سلطان .. شوف أنا سبت الشغل في
النادي هيصة وانتخابت .. والعالم عفيسه وجتلك جري .. ما عرفتش
أشتغل أنا عايز أعرف إنته زعلان مني في إيه

سلطان

من قالك زعلان .. أنه مب زعلان منك

راضي

لاء إنته مش طبيعي .. إذا كنت زعلان عشان أنا اشتغلت عند المدام
.. الظروف هي اللي حكمت كده .. إنته فلست .. والشركه قفلت
وانته دخلت السجن .. وانته كفيلي .. أروح فين أنا بئه أما كلمتني
المدام عن النادي اللي عملته مع صديقاتها .. وانهم عايزين سكرتير
.. وافقت .. وفرحت إن أنا حفصل برضه جنبك .. دي عشرة عمرو
يا عم سلطان .. يعني أنا غلطت في دي .. عشان تزعل

سلطان

(جادا معه الآن) من قالك إن أنه زعلان منك .. يا راضي أنا
زعلان من نفسي ... زعلان من الحاله اللي أنه فيها .. يرضيك يا
راضي سلطان بن شاهين آل غيمه (هنا ينفجر) إتحكم فيه مره ..
وتصرف عليه مره .. سلطان بن شاهين آل غيمه مرته تسوق سيارة

.. (بيكي) أنه يا راضي مرّتي تسوق سيارة

راضي الله .. الله .. إيه اللي حصل .. مقلنا خلاص الحياة بئت طبيعية إنته
قلبت ولا إيه

سلطان أنه .. أنه .. تسوق سيارة ... سيارة .. ومخفي .. مخفي .. يا
راضي جارت الدنيا على عطران الشوارب .. شوهرت تاريخ آل
غيمه المحاربين الصناديد .. يقول بو خلف الصمي

راضي الصمي تاني

سلطان تاني وتالت .. الصمي هو اللي سجل تاريخ قبائل العرب .. لو إيه
بو خلف الصمي ألحين جان أقلها تفل في ويهي .. وتطنز علي يقولي
إنته من أحفاد شرشبييل بن عوصان بن اشفنتح آل غيمه

راضي وده مين ده .. كمان ؟! اشفنتح ؟!

سلطان اشفنتح بن عوصان هذا يدي التاسع .. شفت فلم عنتر وعبله .. شفت
يوم يطيح عنتر في الحفرة

راضي آه

سلطان هاذي الحفرة حافرها اشفنتح .. ناس معروفه .. آه يالدنيا

راضي عايز الجد بئه .. إنته مفتري .. وزى ما بتتولوا إنته بترفس النعمه

شفنتح مين وزفت مين .. هو حد لاقى ست زى مراتك .. المفروض

دي تعملها تمثال .. ياه هتأخذ أكبر صدمه في حياتها لو عرفت إنك

لسا بتفكر زى الأول .. ست واقفه جنبك .. بتشقى وتتعب وبتسدد

ديونك .. عشان تحافظ عليك وعلى بيتها وعيالها

سلطان عيب عند الرجال يا ولد

راضي

عيب إيه بس .. المفروض إنته تفتخر بمراتك دي .. أنا لما قريت
منها عرفتھا كويس .. دي شخصية محترمة وعائزه تخدم مجتمعا
.. نادي فتاة الوطن ده اللي عملاه فكرة عظيمة .. والنهارده
الانتخابات كلهم عاوزين يصوتوا ليها .. عارف لو انتخبوها ..
حتبقى سيدة من سيدات المجتمع حاجه فخر يعني ليك والبلد

سلطان

مره .. أنه أفتخر بمره .. ينيت إنت .. إنت مب قبيلي إنت .. إرجع
حق تاريخك وتاريخ أجدادك .. أشق ثيابي .. أنه مررتي تسوق سيارة
.. وتشتغل .. تسوق ياراضي .. تسوق (بيكي) يشوفها الرايح
والياي

راضي

دي في سيارتها حتعدي الشارع مين حيشوفها ؟! مين حيشوفها
والسيارة ماشية ؟!

سلطان

والسيارة ما توقف عند الإشارات .. لي وقفت بيشوفونها .. يعيون ..
يعيون الرجال .. آخ يا عطران الشوارب نسوانكم عند الإشارات
فرجه للرايح والياي

راضي

كده بئه انتة مش عايز تفهم .. يشوفوها عند الإشارات إيه .. إنته
عارف لو انتخبوها النهارده وحينتخبوها ألف في آلميه .. ساعتها
حتبقى صورها في الجرايد كل يوم

سلطان

(مقهورا ومصدوما) في الجرايد

راضي

وحتطلع في التلفزيون لقاءات وبرامج .. ومش بعيد كمان تطلع في
الجزيره

سلطان

آفا .. آفا

وحتبقي إنسانه مشهوره

راضي

(وقد وصل للإنهيار) أنه .. أنه زوجتي مشهوره آفا .. يا عطوان

سلطان

الشوارب .. مرتي مشهوره .. مشهوره .. آه .. آخ .. آخ (يقع

مغميا عليه)

يا عم سلطان .. عم .. سلطان .. يا جماعه ياللي في البيت هنا حد

راضي

يجي يساعدي .. وإنته ما توقعش إلا لما أكون معاك لوحدا .. يا

جماعه أنا مش عارف أعمل إيه .. يا جماعه .. يا جماعه

اظلام

المشهد الثالث

((تفتح الإضاءة على مجموعة التلفزيون تنتظر في الصالة وعهم

الكاميرا والإضاءة .. وتتكون من المذيع - المصور - المخرج -

وفراشين هنود ومن الطابق العلوي نسمع همس نورا وسultan ((

صوت نورا (أمره) سلطان إنزل تحت الصالة .. الريايل ينطرون قولهم دقلق

ومرتي بتيكم .

صوت (كعادته) منهم الريايل ذيله .

سلطان

صوت نورا يااين يسون معاي لقاء .

صوت أمس بعد عندج ريايل

سلطان

صوت نورا هاذيلاك الجرائد ... هاذيله التلفزيون

صوت مشهوره صرتي .. مشهوره .

سلطان

صوت نورا (مازحه) وراء كل إمراة مشهورة رجل عظيم .

صوت أما هذي صحيح .. صحيح .

سلطان

- صوت نورا خدمة المجتمع أهم من كل شئ .. عاد يله روحهم .
- سلطان آه .. آه ..
- نورا شفيك .. معتفس .. ومضايق فيك شئ .
- سلطان لا .. لا .. لا .. ما فيه شئ .. عيل أروح حق الريايل أقولهم مرتي بتيكم .
- نورا إيه واللي يسلمك .. ويود .. خل خلود عندك .. وهادي رضعته ترى توني مسويتها له .. عاد يله قوم روح
- سلطان رايح أنه رايح .. عيل بيطلعونج في التلفزيون (متضايق لكنه كمن يبتسم لها)
- نورا فرحان يا سلطان
- سلطان (ساخرا الآن) وايد مستانس .. باجوفج في التلفزيون .. إن شاء الله يحطونج في البرنامج الي يحبونه الشباب .. الثقافي .. منيو كليب .. مع ذيج اللي تلبس بنطلون جينز ضيق .. والتلفزيون يقربون من الجنز علشان الشباب يتتقف .. تصير ثقافته جنزيه ..
- نورا شخربط يا سلطان
- سلطان آتغشمر معاج .. شدعوه .. يله بسرعه عاد الريايل مساكين تحس ينطرونج .
- ((ثم نشاهد سلطان قادما من السلم تجاه الصاله حاملا الطفل ومعه المرضاعه .. يصل الصاله .. دون أن يشعر به أحد .. يقف مقتربا منهم))
- سلطان (من غير نفس ومتضايق) أالحين المدام بتي .

- المذيع (لمخرج) عيل يله شوف وين بتحط كاميرتك
- المخرج (يصدر أوامره) نسحب هالكرسی منه شوي .. حظ المزهریه ذي وراء .. يله بسرعه .. الكاميرا ذي الصوب
- المخرج (المصور يحمل كاميرته ويضعها حيث يشير المخرج)
- المذيع (يهمس للمذيع) منهو ذيه (يقصد سلطان) زوجها؟؟
- المذيع لا لا .. ما أعتقد .. الظاهر حد يشتغل عندهم .. زوجها يقولك مليونير .. من كبار المتعاملين في البورصة
- المصور أنا جاهز ..
- المذيع واحنا جاهزين بعد .. ننتظر بس مدام نورا ..
- المخرج (يراها على السلم تنزل) هديه وصلت .. هلا .. هلا .
- (يقف سلطان مقهورا يتابع للحظة ثم يعود للجلوس مكانه)
- نورا (بكامل زينتها) السلام عليكم
- المذيع عليكم السلام .. يا هلا .. محمد ناصر .
- نورا أعرفك شدعوه
- (يقف سلطان كعادته ينظر بقهر)
- نورا دائما أتابع برامجك في التلفزيون ..
- (يعود سلطان للجلوس)
- المخرج أنه مخرج البرنامج .. تفضلي إستريحي .. (للمذيع) محمد ياليت لو تعطي المدام فكره عن البرنامج .
- المذيع لا .. أنه مكلمها من قبل .. بيني وبينها إتصال بالتلفون
- (سلطان يتابع مقهورا)

نورا .. عندي فكره عن البرنامج .. بس أنه أول مره أوقف أمام كاميرا

سامحوني عاد .. الشكل مب تلفزيوني (تمزح معهم)

المذيع (مجاملا) شهاالتواضع مدام نورا .. ويهيج فيه قبول عجيب

المخرج قبول عجيب شنهو .. قول حلوه .. شكلها حلو وايد .. في الكاميرا

فيه جاذبيه .. وعيونها مميزه .. تغطي على مذيعاتك كلهم .

سلطان (دون سيطرة على أعصابه يزعق غاضبا) بس خلاص عاد ..

مطولين إنتو هنيه ..

(يجفل الجميع من صرخة سلطان)

المذيع شفيه هذا ؟!

المخرج شصار !..؟

المصور هي إنت .. منهو ذيه ؟!

نورا (نهدها الوضع وسط دهشتها الشديدة تقف متجهه إلى سلطان لتتحدث

معه على إنفراد) لحظه عن إنكم شوي لو سمحتوا .. (ثم له)

شلي سوبته .. شلي قلته .. شفيك إنت مب صاحي ؟! فسلتتما !!

سلطان (حاله شبه هستيريه) زاد الماي على الطحين .. لا لا لا هذا بيت

عايله

نورا (مندهشه) شقصذك يعني بيت عايله .. سلطان إحترم نفسك ..

وامسك أعصابك .. طريقتك القديمه معاي خلها تولي عنك .. أنا ما

اسمحاك بأي إهانه توجهها لي .. إحنا شعليه متفقين .. وعموما هذا

مب وقت نقاش .. إطلع فوق .. روح وخذ خلود .. بعدين أتفاهم

معاك .. ممكن تروح .

- (سلطان ينظر لها وهو يثور داخلها)
- نورا (بإصرار وقوة الآن) سلطان روح فوق .
- سلطان (وقد ذعر الآن وفكر في الأمر) زين خلاص باقعد ساكت
- نورا ما تقعد .. أقولك تروح .. لا تخلييني أفقد أعصابي .. وأصارخ عليك جدام الناس .
- (يذهب سلطان لأعلى في هدوء ، نورا تعود لهم مبتسمة وكأنها تريد أن تنسيهم ما حدث)
- نورا (بإبتسامه) أنه أسفه يا جماعه ما عlish سامحوني
- المذيع لا لا إحنا اللي أسفين إذا سببنا لج مشكله ولا شئ
- نورا (مهدئه الأمور تماما) لا لا ما فيه .. زوجي بس ساعات تصيده ضيجه .. هو دائما جديه
- المذيع هذا الأخ زوجج ؟ .
- نورا اينعم .
- المخرج يعني كلشي عادي الأمور أوكيه ..
- نورا إيه .. إيه .. تفضلوا نبتدي أنه جاهزه
- المخرج محمد جاهز
- المذيع مكاني عدل
- المخرج لف شوي صوب مدام نورا .. (للمصور) جاهز حسن
- المصور داير
- المخرج يله فايف .. فور .. ثري .. تو .. هدوء بدون صوت .. ون .
- (يظهر في هذه اللحظة سلطان قادم من أعلى فيشير له المخرج بما

معناه هدوء .. بدون صوت .. يحاول سلطان أن يفهم الإشارة فيطلب
من المخرج أن يفهمه ما يريد .. المخرج يعاود الإشارة له بنوع من
العصبيه .. وكل ذلك مترامن مع مقدمة المذيع)

المذيع

(المقدمة) .. مشاهدنا الأعزاء .. في مسيرة هذا الوطن نلتقي
بأسماء .. لا بد نقف عندها .. نحاورها .. نبحر في سماء طموحها
نتعرف عن قرب إليها .. وحلقة اليوم مع إسم من هذه الأسماء إنها
السيدة .. نورا القوع .

(سلطان يختار متعمدا قرب الفراش الهندي الواقف خلف كارتون
الشاي والقهوة الخاص بالمجموعة ويسحب شيء ويجلس عليه)

المذيع

إخت نورا .. نرحب فيج في هذا البرنامج

أهلا وسهلا

نورا

المذيع

في البداية نريد أن نلقي الضوء على نادي فتاة الوطن .. كيف كانت
الفكرة .. ولماذا ؟!

(نتحدث نورا لكن لا نسمع كلامها لأن التركيز الآن على سلطان
الذي نراه وكأنه يبحث عن مشكلة .. فهو ينظر للهندي بجانبه نظرات
مخيفه غريبه .. يجفل الهندي)

(هامسا بغضب) شنو فيه بابا ؟!

الهندي

جب

سلطان

(يبتعد الهندي بسحب كرتونة الشاي والقهوة بعيدا عن سلطان لكن
سلطان يتبعه بأن ينسحب هو تجاهه متعمدا)

نورا (بعد هدوء حركة سلطان والهندي نسمع الآن صوت نورا) وهذا
تواجد فاعل للمرأة القطرية في محيط المجتمع (حماس ونقاش ساخن
مستمر)

المذيع أخت نورا .. ما هي أهم عقبة تقف حائل ضد تطور دور المرأة
(الهندي يصرخ في سلطان)

الهندي (غاضبا) بابا شنو فيه إنته ..

سلطان (يرفع صوته الآن) أقولك جب .. وإحترم نفسك ..

(ينهض سلطان وقد وجدها فرصة الآن لخلق معركة .. ماسكا
الهندي ليضربه)

المخرج ستوب ... ستوب ... شصاير ؟!

(يركضون لفصل سلطان عن الهندي)

المذيع يودوهم .. يودوهم .. فاججوهم .

نورا لا سلطان .. لا سلطان .. سلطان

(يتدخلون الآن لفض الاشتباك بينهما)

الهندي شنو فيه

سلطان جب .. تهيني في بيتي .. يالانذل

المخرج إشصار بينهم ؟

المذيع مادري والله .

سلطان قاعد يسوي لي حركات .. أنه تهيني

المصور (للهندي) شسويت بابو

الهندي (مندهشا) مافيه يسوي شئ

سَلْطَان جب .. جب .. بعد تتكر بعد .. بالجلب .. بره إطلع من بيتي ..
إطلع .. كلکم طلّعوا .. بره بس خلاص .. رفیجکم یهیني إنتو مثله
بره .. بره یله .

المذیع صل علی النبی .. خلاص .. خلاص .. کلنا بنمشي ما فیہ داعي
حق لصراخ

(نورا ترأقب المنظر وهي فی قمة الضیق)

المذیع (لنوره) معلیه إخت نورا لا تضایقین إحنا مقدرین الموقف

المخرج لموا الأغراض

سَلْطَان أنه آنهان فی بيتي

المخرج خلاص عاد قلنا لك بنطلع

نورا أنه مب عارفه شاقولکم ...

المذیع (وقد فهم الموقف والقصد منه .. يتحدث معها لكن فی الأصل هو

يقصد أن یغیض سلطان) إنتي لا تقولين شی إخت نورا .. إنتي

رايتج بیضه .. ما قصرتي .. (بعضهم یخرج الآن)

سَلْطَان زین بره یله بره .. أقولك بره

المذیع (مصر علی نرفزته) موعدنا إنشاء الله فی النادي .. باکلمج اللیلہ

باتفق معاج علی الموعد .. رقمج عندي .. حافظه أنه

سَلْطَان (وقد وصل قمة الغضب) بره یله من زین برنامجك إنته ألحین)

یکون المذیع آخر واحد وقد خرج الآن)

سَلْطَان (يتابعه من الباب بکلامه) لو تموت ما تسوي لقاء معاک .. تهینونا

في بيوتنا .. وتبون بعد تسوون لقاءات معانا .. عيب بس عيب إنتسه
مذيع تسوي هالحركه .. تف على هالويه
(يعود الآن إلى الصاله من جهة الباب ونورا تقسف حزينه وقد
استوعبت كل أسباب ما حصل)
(لحظة صمت بينهما)

سلطان

(يقطع الصمت محاولا تبرير ما حصل لأنه بدأ يشعر أن نورا غير
راضيه عما حدث) يهينونا في بيوتنا .. وتعالوا سوو لقاء (تأكيد
الخائف) والله .

(نورا تغلي من الداخل صامته تنتظر له)

سلطان

(مرعوب من الداخل ويؤكد لها مره أخرى) والله

نورا

شلي سويته يا سلطان وين حبيك اللي قلته لي وأنت في السجن
وصدقتك أنه .. قلت الظروف بتعلمك إن الإنسانه اللي هي المرأة
اللي تهينها وفي نظرك ما تسوى شي .. هي الوحيدة اللي وقفت
معاك .. هذا يزاي الإهانه وتشويه صورتي وسمعتي جدام الناس .

سلطان

عزيزه وغاليه إنتي يا أم خالد .. واللي يسلمج لا تفهمين الموضوع
غلط .. هو غلط علي في بيتي .. ولما يغلط علي جنبه يغلط عليج ..
وأنه ما أرضه حد يغلط عليج .

نورا

الريال واقف في سبحانيته كلنا واقفين وانشوف

سلطان

ما جفتوه إنتو يسوي لي حركات إهانه بيده

نورا

متأكد يا سلطان

سلطان

جايف صبعه أنه

نورا

متأكد من كلامك يا سلطان .. وإلا اللي داخلك طلع غصب عنك ..
سلطان بو خلف الصمي حي في صدرك لين أحين مب مثل ما قلتلي
في السجن إنه مات وانولد سلطان يديد يقدر المرأة ويحترمها
ويعترف بدورها في المجتمع مثلها مثل الرجل ..

سلطان

آنه يا أم خالد .. شحقه تكبرين الموضوع .. سجن وما سجن شيايب
هالكلام أحين .

نورا

آنه ما أقول هالكلام علشان أهددك .. صج بكلمه مني ترجع السجن
بكره مره ثانيه .. لكن مب آنه اللي تسوي جزيه .. آنه بس أذكرك
بكلامك .. اللي قلت باصداقه .. علشان بيتي وولدي وعلشان نعيش
مرتاحين .. مب علشان تسمعي كلام مثل السم شقصدك يعني يوم
قلت هذا بيت عايله .. إشجاييني آسوي إذا إنت شاييف غير إن فيه
إنسانه محترمه قاعده تؤدي دور لخدمة مجتمعها وإن فيه ناس يايين
البيت يتحدثون معاها عن هذا الدور تكريم لها وإحترام .. قول ..
شاييف غير هالشيء .

سلطان

بل .. بل .. بل .. وين راح مخج (ييحث له الآن عن مبرر) آنه ..
آنه قلت بيت عايله .. طلعت مني لأن خالد كان يبي يرقد .. وبيت
عايله يعني عندنا ياهل .. قلتها علشان ما يتحجون بصوت عالي
ويمكن علشان خالد عصبت شوي وبين علي جني غلطان

نورا

(متألّمه من الداخل) لا تحاول تقنعني يا سلطان

سلطان

زين يمكن أنه كبرت السالفه شوي .. (بنوع من الضعف)
لا تلوميني .. إنتي بنفسج قايله .. الإنسان ما يتغير مره وحده تبقى

عنده لازم أشياء من قبل .. لا تلوميني .. مره وحده آشوفج بين
ريابيل شكثر .. المفروض خطوه خطوه ..
شتخربط .. شتقول ؟! . بس .. بس إسكت

نورا

شحقه أسكت إنتي اللي قايله .. تبقى عند الآدمي أشياء في منطقة
مادري وين في جسمه .

سلطان

(ساخره بضحكه) في اللا شعور

نورا

زين أنه تامه عندي عندي فيها أشياء من قبل إنشاء الله مع الوقت
بتروح .. سامحيني عاد يا أم خالد .

سلطان

(نورا صامتة وكأنها تفكر في أمر ما .. ومن الممكن هنا موسيقى
مصاحبه لها)

سامحيني

سلطان

(ترغب في إنهاء الموضوع بقصد واضح) إيه سامحتك خلاص ..
خلاص .

نورا

إيه هالشكل .. آفا عليج بس يا أم خالد .. تدرين أنه شعليه ناوي
خليني بس ألقى شغل ويمشي لي راتب وترد يدي شوي .. أنه
موصي الربع كلهم .. إنشاء الله بيلقون لي شغل .. ناوي إنشاء الله
أسويلج تمثال .. إنتي فخر فخر لي أنه .. سيده من سيدات المجتمع
.. خليني ألقى شغل بس .

سلطان

(هنا يرن التلفون فيرفعه سلطان)

آلو .. عليكم السلام .. إينعم موجوده .

سلطان

(في هذه الأثناء يرن جهاز التوك باك في الصاله)

سلطان

(يسلم نورا التلفون بسرعه) يودي .. يودي .. هادي وحده تبيح ..

(نورا تأخذ التلفون بينما يتجه سلطان للتوك باك)

صوت بابا .. أنا مال وكاله .. يجيب سياره جديد من شان مدام .. مبروك

هندي

بابا .. مبروك .

(سلطان يعود لحالة الغليان هنا وهو يخبر نورا)

نورا

(وهي ما زالت متضايقه وتتحدث في التلفون) منهو ذيه ..

شيقول ؟!

سلطان

(يتصنع الفرح والضحكه لكنه يغلي) يقول يابو السياره .. إنشاء الله

بس ركبوا المخفي .. المخفي أمان .. أمان .. مبروك .. مبروك

(يخرج سلطان من باب الصاله)

نورا

ما سمعتي شئ يا ساره .. هاذيه بسيط .. ما يصيح ألحين هو

بياركلي بالسياره .. من قالج طبيعي .. لا هو طبيعي ولا أنه يا ساره

.. أنه وايد تعبانه يا ساره .. لا لا اليوم ماقدر ايي النادي نفسيتي

وايد تعبانه .. أرجوج تعالي لي محتاجه أقعد معاج .. أنطرج .. مع

السلامه .

(مع إغلاقها التلفون يدخل سلطان حاملا مفاتيح السياره الجديده ..

مع دخوله واضح ان فكره لمعت في رأس نورا)

سلطان

(يقولها وكأنه يعلن عن مصيبه) يابو السياره .. تفضلي

(يسلمها المفاتيح)

- نورا (مبالغه في طبيعتها معه وتتصنع الفرح والسعاده) إعجبتك يا أبو خالد
- سلطان إيه حلوه .. بس
- نورا (متصنعه معه حالة الحب بقصد) بس شنهو ؟!
- سلطان ما فيها ... مخفي .. المخفي أمان .. أمان
- نورا بعدين هالأشياء ... المهم يا سلطان ما دام السيارة الحين وصلتت .. شرايك نطلع فيها ونجربها ؟ ؟!
- سلطان يله امشي هاتي لسويج
- نورا شحقه لسويج ؟!
- سلطان شلون أشغل السيارة !
- نورا أنه اللي بسوق .. إنته غقعد حذاي .
- سلطان (يستغرق سلطان في ضحكه عميقه وطويله ساخر)
- نورا شبيضحك ؟
- سلطان (مستمر في الضحك)
- نورا يه ليش تضحك ؟ !
- سلطان (يتحدث بصعوبة جدا مع الضحك المستمر) مستانس .. إنتي تسوقين (يقلد الحركة) وأنه قاعد حذاج (يتخيل جلسته بجانبها)
- نورا (بعمد) الله .. منظر حلو .. صح .
- سلطان وايد
- نورا زوج .. مقدر زوجته .. ومحترمها .. ما عطيتها مكانتها كأنسانه لها قيمتها .. مثلها مثله .. راكب معاها سيارتها .. شكل حضاري ..

سلطان صح شكل حضاري اهي (يقد الحركه) وهو (يمثل كأنه يرد
السلام على أحد الماره) عليكم السلام .. هلا بوخميس .. هلا سعد .
نورا شتسوي ؟!

سلطان أنه قاعد غذاج وآسلم على الربع .. هلا بومنصور .. ها شتقول
ما اسمع يا بومنصور .. (يعود الآن وكأنه سمع حيث كان كمن يطل
من السيارة) الله ينعم بحالك .. حضاري .. حضاري .
نورا يله

سلطان (وسط الضحك ما زال) وين ؟!
نورا (الآن بكل جديه تكلمه في تحول منها عن المسايرة) سلطان
تغشمرنا وايد بس خلاص .. قم تعال معاي .

سلطان (يعود لطبيعته) من صجج إنتي .
نورا ليش شطالبه منك أنه
سلطان (مذعورا) إنتي تسوقين وأنه (يعود للضحك) اقعد حذاج .
نورا (بشئ من الغضب والثورة) إيه شفيها ؟! قول .. تكلم يا سلطان
سمعني رايك

سلطان (مترددا وبضعف) هو .. المشكله .. الناس شبتقول ؟!
نورا (نأثره ما زالت وتكلمه وهي تشعر بالأسى والالام معاً) أنه ما
يهموني الناس .. الناس مب عايشه معاي .. إنته اللي عايش معاي ..
إنته شتقول ؟

سلطان زين ليش ما سوق أنه ؟!

نورا (بكل تحدي) وليس أنه ما سوق ؟
(ثم لحظة صمت على أثرها نورا تكلمه بشكل عادي وقوي أيضا
مقرره)

نورا طبعاً ما تتلام .. إنك تحس بالعيب لما تركب معاي .. لأن المرأة في
راسك مرتبطة بالعيب .. مب بالتقدير والإحترام ... أنه يا سلطان ما
وقفت معاك وضحييت بكل شيء .. بأعصابي ووقتي بهلي وفلوسي
وطلعتك من السجن علشان تهيني .

سلطان (وقد ارتجف من كلمة سجن) آفا عليج بس يا أم خالد .. أنه يوم
قلتلج أبي أسوق مب قصدي عيب ولا إهانه .. قصدي ما بيع تتعيبين
.. تقدير لج واحترام .. أما إذا إنتي تبين اتعيبين نفسج واتسوقين ما
عندي ما نع .

نورا (وقد فهمت سر التغير) مب علي أنه يا سلطان .. لما سمعت
طاري السجن غيرت رايك .. إنته ما تغيرت يا سلطان .

سلطان (يدافع بحراره) من يقول .. ليش انتي تكبرين الأمور يا أم خالد .

نورا خلاص .. خلاص خلني بروحي .

سلطان يله امشي نجرب السياره سوقي انتي .. بعد شتتين

نورا مابي شيء بس خلاص خلني (ترفع صوتها) قللتك خلني خلاص

سلطان زعلانه كل شيء إلا زعلج .. نورا عاد خلاص ما صار شيء

(هنا يرن جهاز التوك باك في الصاله .. وتكون نورا قريبه في

حركتها الآن من الجهاز فتقوم هي بالضغط للرد)

- نورا من ؟
- ص . ساره (عبر الجهاز) أنه ساره !
- نورا هلا ساره حياج .. (له) خلاص روح فوق ألحين .
- سلطان باروح حاضر بس بشرط .. بعدين نطلع في السياره إنتي تسوقين وأنه قاعد حذاج زين .
- نورا يستوي خير روح عاد المره يايه
- (مع ذهابه لأعلى تكون ساره خلف الباب مع إختفائه كاملا تظـهر ساره الآن وتدخل)
- ساره (تدخل وهي متحمسه لمعرفة ظروف نورا) خير شفيح شكلج متضايقه وايد .
- نورا (بضيق) مادري شقولج يا ساره
- ساره شصاير ؟!
- نورا أول شئ أنه مب مضايقه .. أنه محتاره .
- ساره في شنو ؟!
- نورا في حياتي مع هالريال ..
- ساره (مندهشه) ما قلتني تغير إميـه وثمانين درجه .. وصار إنسان طبيعي معاج .
- نورا كلام ياساره .. بالكلام تغير .. لكنه داخله أحس إنه مثل لول .
- ساره زين شعلج منه ما يقدر يسوي شئ .. اليوم إنتي الكل في الكل .. القرار في يدج إنتي سيدة البيت .. تصرفين عليه وتسددين ديونه ..

إنني لو شهر واحد ما سددي عنه يرجعونه السجن .. ليش هو ما
يعرف الحقيقة؟!

نورا حتى لو يعرفها .. أنه مابي اعرفها .. أنه يا ساره ما ضحيت بكل
شيء علشان أستمّر أعيش مع واحد تحت التهديد .. أبي أعيش حياة
.. الواحد يحب ويحترم ويقدر الآخر بشكل طبيعي نابع من داخله
بدون قيود وشروط

ساره هاذيه زوج ما دري شلون شكله .. الصراحه ووحده مثلي ما دري
ليش صابره عليه هلكت

نورا (مقررّه بقوة) ما ظنّ أتم صابره بعد أكثر يا ساره .. لأن كل شيء
له حدود .

إِظْلَام

المشهد الرابع

(بعد الإضاءة نفتح على سلطان وهو في قمة غضبه وثورته وقد عاد لشخصيته السابقة .. في معركة حوارية مع نورا مستمرة)

سلطان

(يقف على السلم مخاطبا حجرة النوم) مب تتصلين بهلج .. إتصلي بمعارفج اللي تعرفينهم كلهم .. إتصلي باللي تبين إتصلي بالعالم كله .. مب كفو حد في هالدنيا ينزل كلمتي الأرض بس عاد اللعبة تلعب بأهلها .. زمن الخريطة إنتهى .. باب الحوش ما توصيلنه .. تقولين شغل وما شغل ما عندنا حريم تشتغل .. مب كفاية اللي استوى على عطران الشوارب .

(هنا يكون هو نزل من السلم فيسرق لحظة إتصال بالهاتفون في يده للبنك)

سلطان

(بصوت منخفض حتى لا تسمعه) ألو .. أنه الله يسلمج اللي كلمتج مساعه الصبح أبي أتأكد من الراتب نزل ولا لاء .. أول راتب هاذيه ينزل لي .. إيه صح حولتيني عليه وقالني نزل الراتب .. بس حبيت تحوليني عليه مره ثانيه أتأكد تسلمين .. ألو .. معاك سلطان

بن شاهين آل غيمه .. اينعم مكلّمك .. بس مادري شلون حببت أتأكد
.. أكيد يعني الراتب نزل في الحساب واللي يسلمك بعد طقه جذبه
بس على الكمبيوتر .. ليطنن قلبي .. تسلم (يغلق السماعه)
(ثم يواصل ثروته عليها ناحية السلم)

سلطان

((يعتلي الدرج ليتكلم معها) من اليوم مابي أسمع لج صوت ..
غير تامر .. وحاضر وتحت أمرك من اللي صار واستوى ذاك شئ
غصب عني مجبور .. إنسيه وطر مضى .. ترى ليسننج عندي
وسويج السيارة عندي وبطاقة الشغل عندي .. وإن نطقتي وسمعتج
لحظة تيبين طاريهم .. لا تلومين إلا نفسج ..
(فجأة وكأنه تذكر شيئاً مهماً بسرعة فيقوم بالاتصال بسرعة شديدة
خائفاً)

سلطان

(بصورة آلية سريعة) ألو .. مسئول الحسابات لو سمحتي بسرعة
ألو .. معلش معاك سلطان .. الله يسلمك .. اللي مكتوب عندك
إسمي كامل .. سلطان بن شاهين بن كليب بن مسعود آل غيمه..
تسلم (يغلق السماعه)

(يندفع الآن من باب الصاله الجميع خلف بعضهم البعض ويدخلون
الأم .. الأب .. الخال .. ناصر)

شصاير ؟!

الأب

ما دري .. متصله نقولي هاتيهم وتعالى بسرعه

الأم

حاسب .. حاسب

الخال

هي إنت وين إختي ؟!

ناصر

إمش نبليخ الشرطة عنه ؟!	الخال
بنتي شفيتها يا سلطان .. بسم الله الرحمن الرحيم .. شفيك إيطالعني جذيه .. نافخ صدرك .. بسم الله الرحمن الرحيم .	الأم
(راضي وساره يدخلان مسرعان وهما يكملان حوارهما) أنا ما عرفتش كلمتني بسرعه آلت تعالى .	راضي
(تفاجأ بالموجودين) السلام عليكم	ساره
(كالطاووس يقف فوق السلم) بعد حد بيبي وراكم ؟! (لها) متصله بعد بحد غير هالحبريش .. ننظرهم بعد ايون .. ما تصلني بعد بالأمم المتحدة .. وحماية البيئة .. أقولج لو تلميين علي الدنيا كلها .. من اللحظة هادي إنسي تردين مثل ما كنتي حرمه ما توصلين باب البيت .. والكلمه كلمة الريايل .. وأنه ريال البيت قالوها عطران الشوارب الله .. الله .. إنت رجعت تاني .	سلطان
جب إنت جب .. تعال وقف تحت عندي هنيه من اليوم انت بعد تود علي شغلك عندي .. أنه كفيلك والكلمه كلمتي .	راضي
شمستوي بينكم .. شصاير ؟! بنتي وين ؟! .. شصاير ؟!	سلطان
إشصاير إشتغلت ومش راتبي ؟!	الأم
عدل .. والله إني قابلتها .. قلبي قارصني منه .. مقبوله .. ذيل الجلب ما ينعدل .. هادي آخرتها عقب ما عطتك حلها وحلالها .	ناصر
جفتي .. ألحين لو عندي سيارة .. عطتني وإلا ما عطتني .. ذاك وقت راح .. كبوه .. كبوه .. الحسين أنه ريال البيت والكلمه كلمتي .. ما بيها لا تشتغل ولا توصل باب	سلطان

- البيت وأنه حر .
- الخال إمشو نبلغ الشرطه !!
- راضي ما كنا كويسين يا عم سلطان .. والمرأة نصف المجتمع .. والنصف الأولاني والنص الثاني .. راح فين كل ده .
- سلطان قايلين لك جب إنت .
- ساره (لراضي) لو سمحت يا راضي .
- سلطان أقول خوش .. قاموا يسكتون في بيتي .. الكل يتدخل آشوف اللي نعرفه واللي ما نعرفه .. أنه ما دري ليش مناديتكم !؟
- نورا (تخرج هنا بالحقيبه وإينها خالد) مناديتهم علشان يحضرون نهاية المسرحية يا سلطان .
- سلطان مسرحية .
- نورا نعم .. يا سلطان .. تره الشركة اللي إشتغلت فيها إنت هي شركة أخو سارة .. وأنه شغلتك بالإتفاق معاها .. والراتب اللي نزلك اليوم في حسابك من عندي أنه .
- سلطان (مرتبك) إش .. اش .. اش .
- راضي اش اش إيه بس .
- نورا (تواصل وسط دهشة سلطان وصدمته) هذي هي المسرحية اللي حبيت أكشفك فيها على حقيقتك .. أمام نفسك أولا وأمامي وأمام الجميع .. (مقررة) سلطان أنه طالع من البيت .. ولا يمكن أرجع أعيش فيه مره ثانيه .. إلا لما يكون لي فيه وجود يحترم إنسانيتي .. يله يمه .

(تخرج نورا وخلفها أمها ومعهم ساره أيضا)	
الخال	لا تروحون وتخلوني .. (ساخرا) أخاف منه .. ريال الكلمه كلمته .. يمه (يضحك) .
ناصر	تستاهل لو معطيني سيارة جان ما صار لك جذيه .
الأب	يله .. يله نمشي .
الخال	إي والله بسرعه طلعتني .. أخاف منه .. قوي .. هاها .. (سلخرا) سمعته يا نوبصر يقول إشتغلت وشنهو ؟
ناصر	ومشا راتبي .
الخال	لا ركض .. هاهاهاها ..
الأب	(يخرجون) (يطل قبل خروجه) خوش مسرحية .
	(يظل الآن راضي وسلطان الصامت المنهار .. راضي ينظر
	لسلطان ويغرق في الضحك على الموقف)
سلطان	جب إنت بعد .. تضحك يالخايس على عطران الشوارب
راضي	هيه لسه فيها شوارب .. متياله بئه .
سلطان	ياالله شنو
راضي	بقولك متياله بئه .. متعمليش فيها راجل .
سلطان	شنو ؟!
راضي	إنته فاهم .. خلاص مافيش حد موجود إلا أنا وإننت ما تبيله .
سلطان	ياالله شنو ؟!
راضي	ماتوقع علشان أمسكك .. مش دي نهاية المسرحية

سلطان

قرب .. تعال .

(يقترب منه فيقع سلطان عليه)

ويسدل الستار